

四庫全書薈要

• 乾隆御覽本

經部

春秋傳卷十四

宋 胡安國 撰

文公上

公名興僖公于母聲姜諡法慈惠愛民曰文忠信接禮曰文

周

襄王二十六年魯文公八年襄王崩于頃王立文十四年頃王崩于匡王立

鄭

穆公二年

齊

昭公七年魯文公十四年昭公卒于舍立九月舍弑商人立文十八年懿公弑惠公元立

宋

成公十一年魯文公七年成公卒昭公杅白立文十六年昭公弑弟大公鮑立

晉

襄公繼霸二年魯文公六年襄公卒于靈公夷皋立是年趙盾為政

衛

成公九年

蔡

莊公十九年魯文公十五年莊公卒子文公申立

曹

共公二十七年魯文公九年共公卒子文公壽立

滕

詳見隱公元年魯文公十二年滕昭公來朝

陳

共公六年魯文公十三年共公卒子靈公平國立

杞

詳見隱公元年

薛

詳見隱公元年及僖公元年

莒

魯文公十八年莒太子僕弑紀公庶其子季佗立

邾

文公四十二年魯文公十三年邾文公卒子定公纘且立

許

僖公二十九年魯文公五年僖公卒昭公錫我立

小邾

詳見僖公元年

楚

成王四十六年魯文公元年冬商臣弑成王而自立為穆王文十三年穆王卒子莊王立始爭霸

秦

穆公三十四年○秦用孟明以為政魯文公二年秦伯伐晉濟河焚舟遂霸西戎史記穆公三十七年益

國十二開地千里天子使召公過賀穆公以金鼓文六年穆公卒子康公瑩立文十八年康公卒子共公

立

吳

詳見隱公元年

越

詳見隱公元年

乙亥王二年元

晉襄二年齊昭七年衛成九年蔡莊二十年鄭穆二年曹共二十七年陳共六

年杞桓十一年宋成十一年秦穆三十四年楚成四十六年弒

# 春王正月公即位

即位者告廟臨羣臣也國君嗣世定於初喪必逾年然後改元書即位者緣始終之義一年不二君緣民臣之心不可曠年無君按書載舜禹受終傳位之事在舜則曰月正元日格於文祖在禹則曰正月朔旦受命於神宗率百官若帝之初夫子文祖神宗則告廟也率百官若帝之初則臨羣臣也自古通喪三年其以凶服則不可入宗廟其以吉服則斬焉在衰絰之中不可既成而又易之也如之何而可子張問於

孔子高宗諒陰三年不言何謂也子曰何必高宗古  
之人皆然君薨百官總己以聽於冢宰三年則告廟  
臨羣臣固有攝行之禮矣按商書稱太甲元年伊尹  
祠于先王則攝而告廟之證也百官總己以聽冢宰  
則攝而臨羣臣之證也其曰祇見厥祖者言伊尹以  
奉嗣王之事祇見太甲之祖也至三祀十有二月伊  
尹以冕服奉嗣王則免喪從吉之證也然顧命康誥  
記成王之崩其君臣皆冕服何也當是時成王方崩  
就殯猶未成服故用麻冕黼裳入受顧命已受命誥  
諸侯而後釋冕反喪服者於是成服而宅憂也或以  
為康王釋服離次  
而即吉則誤矣

二月癸亥日有食之音註

不書朔官失之

天王使叔服來會葬音註

叔氏服字諸侯喪天子使大夫會葬禮也

凡崩薨卒葬人道始終之大變也不以得禮為常事而不書其或失禮而害於王法之甚者聖人則有削而不存以示義者矣

# 夏四月丁巳葬我君僖公

## 天王使毛伯來錫公命音註

毛國伯爵諸侯為王卿士者○自隱至文六君惟桓

文書即位而後書錫命以其自即位也

諸侯終喪入見則有錫歲時來朝則有錫能敵王所愾則有錫敵冕圭璧因其終喪入見而錫之者也禮所謂喪畢以士服見天子已見賜之敵冕圭璧然後歸是已車馬衣黼因其歲時來朝而錫之者也詩所謂君子來朝何錫予之雖無予之路車乘馬又何予之玄衮及黼是已彤弓旅矢因其敵愾獻功而錫之

者也詩所謂彤弓彤旂兮受言藏之我有嘉賓中心貺之鐘鼓既設一朝享之是已今文公繼世喪制未畢非初見繼朝而獻功也何為來錫命乎故殺音註錄梁子曰禮有受命無來錫命來錫命非正也音與盧子

# 晉侯伐衛

叔孫得臣如京師音註

叔孫得臣叔牙之子

# 衛人伐晉

秋公孫敖會晉侯于戚音註

戚衛邑○此大夫專會諸侯之始

冬十月丁未楚世子商臣弑其君頹音註

商臣弑成王而代立是為



穆王顓  
邱倫反

書世子弑君者有父之親有君之尊而至於弑逆此  
天理大變人情所深駭春秋詳書其事欲以起問者  
察所由示懲誡也唐世子弘受左氏春秋至此廢書  
歎曰經籍聖人垂訓何書此耶郭瑜對曰春秋義存  
褒貶以善惡為勸戒故商臣千載而惡名不滅弘曰  
非惟口不可道故亦耳不忍聞願受他書瑜請讀禮  
世子從之嗚呼聖人大訓不明於後世皆腐儒學經  
不知其義者之罪耳夫亂臣賊子雖陷穽在前斧鉞  
加於頸而不避顧謂身後惡名足以繫其邪志而懲  
於為惡豈不謬哉持此曉人可謂茅塞其心意矣若  
語之曰為人君父而不通於春秋之義者必蒙首惡  
之名為人臣子而不通於春秋之義者必陷篡弑誅  
死之罪聖人書此者使天下後世察於人倫知所以  
為君臣父子之道而免於首惡之名誅死之罪也則

世子弘而聞此必將慊然畏懼知春秋之不可不學  
矣學於春秋必明臣子之義不至於奏請佛旨而見  
醜矣傳者按也經者斷也考於傳之所載可以見其  
所由致之漸豈隱乎嫡妾必正而楚子多愛立子必  
長而楚國之舉常在少者養世子不可不慎也而以  
潘崇為之師侍膳問安世子職也而多置宮中降而  
不憾憾而能矜者鮮矣乃欲黜兄而立其弟謀及婦  
人宜其敗也而使江芊知其情是以不仁處其身而  
以不孝處其子也其及宜矣楚額僭王憑陵中國戰  
勝諸侯毒被天下然昧於君臣父子之道禍發蕭牆  
而不之覺也不善之積豈可揜哉君不君則臣不臣  
父不父則子不子春秋書世子弑其君者推本所由  
而著其首惡為萬世之大戒也然則商臣無貶  
矣曰弑父與君之賊其惡猶待於貶而後著乎

音註

世子弘見唐孝敬皇帝弘傳  
才性反懽音聳悚同芊音弭

# 公孫敖如齊

丙襄王二  
申十七年  
二年  
晉襄三齊昭八衛成十蔡莊二十一鄭  
穆三曹共二十八陳共七杞桓十二宋

成十二秦穆三十五  
楚穆王商臣元年

春王二月甲子晉侯及秦師戰于彭衙秦師敗績音註

彭衙  
秦地

戰而言及者主乎是戰者也夫敵加於已不得已而  
起者謂之應兵爭恨小故不忍忿怒者謂之忿兵按  
左氏秦孟明帥師伐晉報殺之役此所謂忿兵疑罪  
之在秦也而以晉侯主之何哉處已息爭之道遠怨  
之方也然則敵加於已縱其侵暴將不得應乎曰敵  
加於已而已有罪焉引咎責躬服其罪則可矣已則

無罪而不義見加諭之以辭命猶不得免焉亦告於天子方伯可也若遽然興師而與戰是謂以桀攻桀何愈乎故以晉侯為主者處已息爭之道寡怨之方王者之事也

## 丁丑作僖公主

作主者造木主也既葬而反虞虞主用桑期年而練祭練主用栗用栗者藏主也何以書僖公薨至是有五月然後作主慢而不敬甚矣夫慢而不敬積惡之原也以爲無傷而不去至於惡積而不可撝所以謹之也

## 三月乙巳及晉處父盟音註

處父姓陽為晉正卿也朝而盟始此

及處父盟者公也其不地於晉也諱不書公者抑大夫之仇不使與公為敵正君臣之分也適晉不書反

國不致為公諱恥存臣子之禮也  
凡此類筆削魯史之舊文衆矣

夏六月公孫敖會宋公陳侯鄭伯晉士穀盟于垂隴音

註 垂隴鄭地○晉遂以大夫盟諸侯也大夫而與  
諸侯敵於是始是故書士穀而後凡役書大夫

自十有二月不雨至于秋七月

書不雨至于秋七月而不曰至于秋七月不雨者蓋  
後言不雨則是冀雨之辭非大公之意也夫書不雨  
至于秋七月而止即八月嘗雨矣然而不書八月雨  
者見文公之無意於雨不以民事繫憂樂也其怠於  
政事可知而魯  
衰自此始矣

八月丁卯大事于大廟躋僖公音註

躋牋西  
反升也

有事者時祭大事祫也合羣廟之主食於大廟升僖於閔之上也閔僖二公親則兄弟分則君臣以為逆祀者兄弟之不先君臣禮也君子不以親親害尊尊故左氏則曰祀國之大事而逆之可乎子雖齊聖不先父食久矣公羊則曰其逆祀先禰而後祖也穀梁則曰逆祀則是無昭穆也無昭穆則是無祖也閔僖非祖禰而謂之祖禰者何臣子一例也夫有天下者事七世諸侯五世說禮者曰世指父子非兄弟也然三傳同以閔公為祖而臣子一例是以僖公父視閔公為禮而父死子繼兄亡弟及名號雖不同其為世一矣

## 冬晉人宋人陳人鄭人伐秦

按左氏四國伐秦報彭衙之役則皆國卿也其貶而稱人者晉人再勝秦師在常情亦可以已矣而復興此役結怨勤民是全不務德專欲力爭而報復之無已也以致濟河焚舟之師故特貶而稱人

公子遂如齊納幣

婚姻常事不書其書納幣者喪未終而圖婚也夫娶在三年之外矣則何譏乎春秋論事莫重乎志志敬而節具與之知禮志和而音雅與之知樂志哀而居約與之知喪非虛加之也重志之謂也此皆使人私欲不行闕邪復禮之意

丁襄王二年三年

晉襄四齊昭九衛成十一蔡莊二十二鄭穆四曹共二十九陳共八杞桓十三

宋成十三秦穆三  
三十六楚穆二

春王正月叔孫得臣會晉人宋人陳人衛人鄭人伐沈

沈潰音註

沈音審汝南小國

按左氏伐沈以其服於楚也沈潰民逃其上也五國皆稱人將非命卿也沈在汝南平輿縣北未嘗與中國會盟而南服於楚師入其境而民人逃散雖非義舉比於報復私怨之兵則有間矣故其辭無褒貶凡此類欲示後世用師者知權而本之以正也

音註

將去聲

夏五月王子虎卒

音註

王子虎王朝大夫

王子虎不書爵識之也天子內臣無外交或曰禮稱情而為之節文者也叔服新使乎我則宜有恩禮矣仲尼脫駢於舊館雖卒叔服可也夫脫駢於舊館惡夫涕之無從而為之者非禮之經也天子內臣無外交而以新使乎我致思禮焉是以私情害公義失輕重之權矣

音註

駢音參

秦人伐晉

音註

濟河焚舟晉人不出秦於是始伯西戎



按左氏秦伯伐晉濟河焚舟封穀尸而還其稱人何也聖人作易以懲忿窒慾為損卦之象其辭曰損德之修也春秋諸侯之知德者鮮矣穆公初聽杞子之請違蹇叔之言其名為會兵是慾而不能窒也及敗于穀歸作秦誓庶幾能改將窒其慾矣復起彭衝之師報穀函之役其名為憤兵是忿而不能懲也今又濟河取郊人之稱斯師也何義哉晉人畏秦而不出穆公逞其忿而後悔自是見伐不報始能踐自誓之言矣是故於此貶而稱人備責之也

秋楚人圍江音註

江近楚小國

雨螽于宋音註

雨去聲螽音終

冬公如晉

十有二月己巳公及晉侯盟

晉陽處父帥師伐楚以救江音註

晉大夫書帥師於是始自士穀專盟書大

處父專將書大夫於是常書大夫貶而後人之

以者不以者也救江善矣其書以何楚嘗伐鄭矣齊桓公遠結江黃合九國之師于召陵然後伐鄭之謀罷又嘗圍宋矣晉文公許復曹衛會四國之師于城濮然後圍宋之役解今江國小而弱非能與宋鄭比楚人圍之必不待徹四境屯戍守禦之衆與宿衛盡行也當是時楚有覆載不容之罪晉主夏盟宜合諸侯聲罪致討命秦甲出武關齊以東兵畧陳蔡而南處父等軍方城之外楚必震恐而江國自解矣計不出此乃獨遣一軍遠攻強國豈能濟乎故書伐楚以救江言救江雖善而所以救之者非其道矣此春秋

紀用兵之法也

戊襄王二

四年

晉襄五齊昭十衛成十二蔡莊二十三鄭穆五曹共三十陳共九杞桓十四宋

成十四秦穆三

十七楚穆三

春公至自晉

夏逆婦姜于齊

逆皆稱女以未成婦而女者在父母家之所稱也往  
逆而稱婦入國不書至何哉此春秋誅意之效也禮  
制未終思念娶事是不志哀而居約矣方逆也已  
成為婦未至也而如在國中原其意而誅之也不稱  
夫人姜氏者亦與有貶焉婦人不專行何以與有貶  
父母與有罪也文公不知敬其伉儷違禮而行使國

亂子弑齊人不能鑒微知著冒禮而往使其女不允於魯皆失於不正其始之過也夫婦之際人倫之首禮不可不謹也故交貶之以為後鑒

## 狄侵齊

## 秋楚人滅江

## 晉侯伐秦

晉人三敗秦師見報乃常情耳而穆公濟河焚舟則貶而稱人秦取王官及郊未至結怨如晉師之甚也襄公又報之於常情過矣而得稱爵何也聖人以常情待晉襄而以王事責秦穆所以異乎襄公忘親背惠大敗秦師敗狄伐許怒魯侯之不朝也而以無禮施之是專尚威力先事加人莫知省德而後動也今

又報秦不足罪矣穆公初敗於殽悔過自誓增修德政宜若過而知悔悔而能改又有濟河之役則非誓言之意所以備責之也然晉襄見伐而報猶無譏焉秦穆至是見伐而不報善可知矣不譏晉侯所以深善秦伯春秋大改過嘉釋怨王者之事也故仲尼定書列秦誓於百篇之末以見悔過能改而不責人雖聖賢誥命不越此矣

# 衛侯使甯俞來聘

## 冬十有一月壬寅夫人風氏薨

風氏僖公之母莊公妾也而稱夫人自是嫡妾亂矣語曰邦君之妻邦人稱之曰君夫人稱諸異邦曰寡小君蓋敵體之稱也若夫妾媵則非敵矣其生亦以夫人之名稱號之其沒亦以夫人之禮卒葬之非所

以正其分也以妾媵為夫人徒欲尊寵其所受而不  
虞卑其身以妾媵為夫人徒欲崇貴其所生而不虞  
賤其父卑其身則失位賤其父則無本越禮至是不  
亦悖乎夫禮庶子為君為其母無服不敢貳尊者也  
春秋於成風記其卒葬各以實書  
不為異辭者謹禮之所由變也

已襄王三

五年

晉襄六齊昭十一衛成十三蔡莊二十  
四鄭穆六曹共三十一陳共十杞桓十

五宋成十五秦穆  
三十八楚穆四

春王正月王使榮叔歸含且贈音註

榮叔周大夫也榮  
采地叔字也含戶

暗反

珠玉曰含車馬曰贈歸含且贈者厚禮妾母也不稱  
天王者弗克若天也春秋繫王於天以定其名號者

所履則天位也所治則天職也所勅而博之者則天之所敎也所自而庸之者則天之所秩也所賞所刑者則天之所命而天之所討也夫婦人倫之本王法所尤謹者今成風以妾僭嫡王不能正又使大夫歸舍贈焉而成之為夫人則王法廢人倫亂矣是謂弗克若天而悖其道非小失耳故特不稱天以謹之也

### 三月辛亥葬我小君成風

仲子雖聘非惠公之嫡也春秋之初尚以為疑故別為立宮而羽數特異此雖非禮之正然不祔於姑猶有辨焉至是成風書葬乃有二夫人祔廟而亂倫易紀無復辨矣故禮之失自成風始也

### 王使召伯來會葬音註

召伯天子卿也召采地音邵伯爵也○王不稱天於追錫桓公

見之至是再見貶也且文武之教著於南雅莫急於君夫人也桓以少墓長成風以庶亂嫡王道熄矣而莊襄

不能正又從而褒賞之是以天命施之天討也是故皆不稱天

王臣下聘桓公冢宰書名示貶而大夫再聘則無譏焉或以為從同也或以為同則書重也成風薨王使禁叔歸舍且賵既不稱天矣又使召伯來會葬又與貶焉何也歸舍且賵施於妾母已綢繆矣又使卿來會葬思數有加焉是將祔之於廟也而致禮於成風盡矣聘一也舍賵而又葬則其事益隆亂人倫廢王法甚矣再不稱天者聖人於此尤謹其戒而不敢畧也

## 夏公孫敖如晉

## 秦人入郿音註

都國名音若本在商密秦楚之界上後遷南郡郿縣

## 秋楚人滅六音註

六小國或作蓼按地譜壽州安豐縣有六國故城



冬十月甲申許男業卒音註

傷公卒子昭公錫我立

庚襄王三

六年

晉襄七卒齊昭十二衛成十四蔡莊二十

子十一年

十五鄭穆七曹共三十二陳共十一杞

桓十六宋成十六秦

穆三十九楚穆五

春葬許僖公

夏季孫行父如陳音註

行父季友子

秋季孫行父如晉

八月乙亥晉侯驩卒音註

襄公卒明年子靈公夷臯立

冬十月公子遂如晉葬晉襄公

晉殺其大夫陽處父晉狐射姑出奔狄

公羊子曰晉殺其大夫陽處父則狐射姑曷為出奔射姑殺也射姑殺則其稱國以殺何君漏言也易曰不出戶庭无咎何謂也子曰亂之所生則言語以為階君不密則失臣臣不密則失身幾事不密則害成是以君子慎密而不出也凡書殺者在上則稱君在下則稱氏人衆則稱人在微則稱盜君與臣同殺則稱國今殺處父者射姑耳君獨以漏言故亦預殺焉所以為後世戒也或以處父為侵官非歟曰人君用人失當則其國必危凡立于朝者舉當諫君況身為晉國之太傅邪若以為侵官將相大臣非其人百官有司失其職在位者當拱默自全陰聽人主之所為至於顛危而不救則將焉用彼相乎率天下臣子為持祿容身不忠之行以誤朝

音註 射入聲 或作夜

閏月不告月猶朝于廟音註

告音谷  
朝音潮

不告月者不告朔也不告朔則曷為不言朔也因月之虧盈而置閏是主乎月而有閏也故不言朔而言月占天時則以星授民事則以節候寒暑之至則以氣百官修其政於朝庶民服其事於野則主乎是爲耳矣閏不可廢乎曰迎日推策則有其數轉璣觀衡則有其象歸奇於扐以象閏數也斗指兩辰之間象也象數者天理也非人所能爲也故以定時成歲者唐典也以詔王居門終月者周制也班告朔於邦國不以是爲附月之餘而弗之數也猶朝于廟者幸其不已之詞子貢欲去告朔之餼羊子曰爾愛其羊我愛其禮

辛裏王三年

晉靈公夷臯元年齊昭十三衛成十五  
蔡莊二十六鄭穆八曹共三十三陳共

十二杞桓十七宋成十七  
卒秦康公營元年楚穆六

春公伐邾三月甲戌取須句音註

須句魯之封內屬國也  
僖公反其君之後

邾復滅之書取

易也句音俱

遂城邾音註

邾魯邑因伐邾師以  
城邾備邾難邾音吾

夏四月宋公王臣卒音註

成公卒昭  
公杵臼立

宋人殺其大夫音註

宋人攻昭公并殺二  
大夫故以非罪書

書宋人者國亂無政非君命而衆人擅殺之也

音註

大夫不名義繫於殺大夫而其名不足紀也

不稱殺者及死者名

殺者衆死者無罪

戊子晉人及秦人戰于令狐晉先蔑奔秦音註

令狐晉地在河

東令力呈反先蔑

晉人蔑或作昧

按左氏襄公卒太子幼晉人欲立長君趙孟使先蔑如秦逆公子雍秦康公以師納之襄夫人日抱太子以啼于朝曰舍適嗣不立而外求君將焉寘此諸大夫畏逼乃背先蔑立靈公趙盾將中軍以禦秦潛師夜起敗秦師于令狐先蔑奔秦程氏以為晉不謝秦秦納不正皆罪也故稱人晉懼秦之不肯已而擊之是晉人為志乎是戰者也故書及其貶之如此者使後世臣子慎於廢立之際不可忽也治亂存亡繫國君之廢立事莫重於此矣而可以有誤乎奕者舉棋不定不勝其耦况置君而可以不定乎

狄侵我西鄙

秋八月公會諸侯晉大夫盟于扈音註

扈鄭地音戶○不序諸侯散辭

也晉於是始失伯也

諸侯會晉趙盾盟于扈為晉侯立也趙盾內專廢置其君外強諸侯為此盟其不名者見大夫之強也諸侯不序見公之不及於會也文公怠惰事多廢緩既約晉盟而復後至故隱其不及罪公之不能自強於政治魯自是日益衰矣

冬徐伐莒

公孫敖如莒泣盟

壬襄王三十八年

晉靈二齊昭十四衛成十六蔡莊二十七年鄭穆九曹共三十四陳共十三

杞桓十八宋昭公杵臼  
元年秦康二楚穆七

春王正月

夏四月

秋八月戊申天王崩

音註 襄王崩子  
頃王立

冬十月壬午公子遂會晉趙盾盟于衡雍

音註 衡雍鄭  
地與扈

相近

乙酉公子遂會雒戎盟于暴

音註 雒戎雒水名音洛蓋  
諸戎雜居洛水之間

故曰雒戎

暴鄭地

春秋記約而志詳其書公子遂盟趙盾及雒戎何詞之贅乎曰聖人謹華戎之辨所以明族類別內外也雒邑天地之中而我醜居之亂華甚矣再稱公子各日其會正其名與地以深別之者示中國諸戎終不可雜也自東漢以來乃與戎雜處而不辨晉至於神州陸沉唐亦世有諸戎之亂許翰以為謀國者不知學春秋之過信矣

# 公孫敖如京師不至而復丙戌奔莒

按左氏公孫敖奔莒從已氏也男女人之大欲存焉寡欲者養心之要欲而不行可以為難矣然欲生於色而縱於淫色出於性目之所視有同美焉不可掩也淫出於氣不持其志則放僻趨蹌無不為矣敖如京師其書不至而復者言敖無入使于周之意惟已氏之欲從也夫以志徇氣肆行淫欲而不能為之帥



至於棄其家國出奔而不顧此天下之大戒也春秋謹書其事於教與何誅使後人為鑒必持其志修室

慙之

方也

蝨

宋人殺其大夫司馬司城來奔音註

司馬公子印也司城蕩意諸也

印意諸皆

昭公之黨

初宋昭公將去羣公子樂豫以為不可遂舍司馬以讓公子印則印固昭公之黨欲專宋政而昭公固欲以其弟印自衛也夫司馬掌兵之官不選衆舉賢以素有威望為國人所畏服者使居其任乃欲寵其私昵鮮有不亡者矣公子印蕩意諸皆以官舉者見主兵者不能其官至於見殺守土者不能其官至於出

奔而其君不免失  
身見弑之禍宜矣

春秋傳卷十四

春秋傳卷十五

宋 胡安國 撰

文公下

癸頃王九年

晉靈三齊昭十五衛成十七蔡莊二十八  
鄭穆十曹共三十五卒陳共十四杞桓十

九宋昭二秦

康三楚穆八

春毛伯來求金音註

來求止此自是魯雖  
不修貢周無求矣

毛伯天子大夫何以不稱使當喪未君也踰年即位  
矣何以言未君古者諒陰三年百官總已以聽於冢  
宰夫百官總已以聽則是冢宰獨專國政之時託於  
王命以號令天下夫豈不可而不稱使春秋之旨微

矣非特謹天下之通喪所以示後世大臣當國秉政不可擅權之法戒也跋扈之臣假仗主威脅制中外凡有所行動以詔書從事蓋未有以春秋此義折之耳

夫人姜氏如齊音註

姜氏齊昭公女

二月叔孫得臣如京師辛丑葬襄王音註

前年公子遂葬襄公今年

得臣葬襄王是夷周於晉也

晉人殺其大夫先都音註

先都下軍佐也以作亂討故書名

三月夫人姜氏至自齊

夫人與君敵體同主宗廟之事出必告行反必告至則書于策然適他國者或曰享或曰會或曰如衆矣

未有致之者則其行非禮以不致見其罪也出姜如齊以寧父母於禮得行矣其致者非特以告廟書耳夫人初歸豈其不告為文公越禮故削而不書示誅意之法矣今此書至者又以見小君之重也夫承祭祀以為宗廟主一國之母儀而可以搖動乎出姜至是益不安於魯故至而特書以示防微杜漸之意其為世慮深矣

音註

見音現

# 晉人殺其大夫士穀及箕鄭父音註

與先都同罪也

殺先都士穀國也其稱人以殺者國亂無政衆人擅殺之稱也何以知其非討賊之詞書殺其大夫則知之矣三大夫皆強家也求專晉不得挾私怨以作亂而使賊殺其中軍佐則固有罪矣曷為不去其官當是時晉靈初立主幼不君政在趙盾而中軍佐者盾之黨也若獄有所歸則此三人者獨無可議從末減

乎而皆殺之是大夫專生殺而政不自人主出也故  
不稱國討不去其官而箕鄭父書及示後世司賞罰  
者必本忠恕無有黨  
**音註** 去上聲  
偏之意其義精矣 下同

楚人伐鄭公子遂會晉人宋人衛人許人救鄭

按左氏范山言於楚子曰晉君少不在諸侯北方可  
圖也楚子師于狼淵以伐鄭則是貪得無故憑陵諸  
夏之兵也故楚子親將貶而稱人晉宋衛則趙盾華  
孔皆國卿也何以貶而稱人救而不及楚師欲以懲  
不恪也晉主夏盟不在諸侯以啓戎心誰之過乎故  
書救而稱人以罪趙盾之不能折衝消患為夷狄之  
所窺  
**音註** 范山楚大夫少去聲  
將去聲華戶化反

夏狄侵齊

秋八月曹伯襄卒音註

共公卒子文公壽立

九月癸酉地震音註

地道安靜以動為異故書

冬楚子使椒來聘音註

楚君臣始並見於經

楚僭稱王春秋之始獨以號舉夷狄之也中間來聘改而書人漸進之矣至是其君書爵其臣書名而稱使遂與諸侯比者是以中國之禮待之也所謂謹華夷之辨內諸夏而外四夷義安在乎曰吳楚聖賢之後見周之弱王靈不及僭擬名號此乃夏而變於夷者也聖人重絕之夫春秋立法謹嚴而宅心忠恕嚴於立法故僭號稱王則深加貶黜比之夷狄以正君臣之義恕以宅心故內雖不使與中國同外亦不使與夷狄等思善悔過向慕中國則進之而不拒此慎用刑重絕人之意也噫春秋之所以為春秋非聖人



莫能修之者乎

秦人來歸僖公成風之襚音註

衣服曰襚音遂

秦人歸襚而曰僖公成風者非兼襚也亦猶平王來  
謂仲子而謂之惠公仲子爾仲子惠公之妾也然則  
風氏亦莊公之妾曷不書曰來歸莊公成風之襚乎  
曰寵愛仲子以妾為妻者惠公也故書惠公仲子所  
以正後世之為人夫者當明夫道不可亂嫡妾之分  
以卑其身尊崇風氏立為夫人者僖公也故書僖公  
成風所以正後世之為人子者當明子道不可  
行僭亂之禮以賤其父聖人垂戒之義明矣

葬曹共公

甲頃王十年

晉靈公齊昭十六衛成十八蔡莊二十九  
鄭穆十一曹文公壽元年陳共十五杞桓

二十宋昭三秦  
康四楚穆九

春王三月辛卯臧孫辰卒

音註臧孫辰  
文仲也

夏秦伐晉

音註之變於夷秦為之也又三十年而狄鄭

又五十年而狄晉狄

鄭猶可也狄晉甚矣

說者謂秦伐晉以戎狄書蓋闕文者據左氏少梁北  
徵之師兩國相攻無他得失言之也然晉取少梁事  
不經見固未可據秦以狄書者程氏以為晉舍適嗣  
而外求君罪也既而悔之正矣秦不顧義禮是非惟  
以報復為事則夷狄之道也以此狄秦義固然矣或  
者猶有深許晉人悔過能改終不遂非之意故重貶  
秦伯以

音註

少去聲  
下同

見乎

楚殺其大夫宜申音註

宜申子西也

按左氏宜申與仲歸謀弑穆王而誅則是討弑君之賊也曷為稱國以殺又書其官而不曰楚人殺宜申乎曰穆王者即楚世子商臣也而春秋之義微矣

自正月不雨至于秋七月

及蘇子盟于女栗音註

蘇子周卿士也女栗地闕女音汝頃王新立故與魯盟親諸侯

也

冬狄侵宋楚子蔡侯次于厥貉音註

厥貉地闕貉音麥次以見楚之圖伯

而未集也是故書次于郎以見齊霸之難書次厥貉以見楚伯之難

楚滅江六平陳與鄭於是乎為伐宋之舉次于厥貉  
凡伐而次者其次為善次而伐者其次為貶齊師次  
陘修文告以威敵善之也故上書伐楚以著其美楚  
次厥貉藏禍心以憑夏貶之也故下書伐麋以著其  
罪當是時陳鄭宋皆從楚矣獨書蔡侯何哉鄭失三  
大夫俟救而不及陳獲公子筏而懼宋方有狄難蓋  
有不得已者非所欲也蔡無四境之虞則是得已不  
已志在從夷狄矣故削三國書蔡侯見其棄諸夏之  
也惡音註伐音吠

乙頃王十有一年

晉靈五齊昭十七衛成十九蔡莊三十鄭穆十二曹文二陳共十六杞桓

二十一年宋昭四

秦康五楚穆十

春楚子伐麋音註

麋小國近楚音君楚書君將於是  
始自是楚師必圍滅而後貶之

夏叔仲彭生會晉郤缺于承筐音註

郤去逆反  
承筐宋地

秋曹伯來朝

公子遂如宋

狄侵齊

冬十月甲午叔孫得臣敗狄于鹹音註

鹹音咸  
魯地

左氏稱此長狄也而劉敞以為非夫春秋正名之書其稱狄也或曰狄或曰白狄或曰赤狄其稱戎也或曰戎或曰山戎或曰姜戎或曰陸渾之戎不別其種類書之于策後亦無所考矣

音註

種上聲

丙頃王十有二年

晉靈六齊昭十八衛成二十蔡莊三十一鄭穆十三曹文三陳共十七杞

桓二十二宋昭五  
秦康六楚穆十一

春王正月郕伯來奔音註

此郕太子朱儒也其曰郕伯見魯以諸侯之禮逆之也是

故郕太子朱儒魯謂之郕伯晉太子州蒲晉謂之晉侯從而書之徒見其悖禮義耳

杞伯來朝音註

復稱伯舍夷禮

二月庚子子叔姬卒音註

叔姬文公女許嫁杞伯後為絕昏至是卒

夏楚人圍巢音註

巢吳楚間小國

秋滕子來朝

秦伯使術來聘音註

秦君臣始並見

冬十有二月戊午晉人秦人戰于河曲

秦伯親將晉上卿趙盾禦之其稱人何為令狐之役故也秦納不正遂非積愆晉不謝秦潛師禦之是以暴兵連禍至此極也凡戰皆以主人及客者處已之道寡怨之方王者之事其不書晉及何也前年秦師來伐晉不言戰者晉已服矣故狄秦而免晉今又為此役則秦曲甚矣故不以晉為主惟勤大衆從秦師不奉詞令以止之也故貶音註河曲晉而稱人此輕重之權衡也

季孫行父帥師城諸及鄆音註

諸鄆本魯二邑近於魯乃莒魯所爭者以其遠

逼外國故帥師城之

丁頃王十有三年

晉靈七齊昭十九衛成二十一蔡莊三十二鄭穆十四曹大陳共十八

卒杞桓二十三宋昭  
六秦康七楚穆十二

春王正月

夏五月壬午陳侯朔卒

音註 共公卒子靈  
公平國立

邾子遽蔭卒

音註 遽蔭音渠除文公  
卒子定公纍且立

自正月不雨至于秋七月

世室屋壞

世室魯公之廟也周公稱太廟魯公稱世室羣公稱  
宮書世室屋壞譏久不修也何以知久乎自正月不  
雨則無壞道也不雨凡七月而先君之廟壞不恭甚  
矣凡此皆志文公怠慢不謹事宗廟以致魯國衰削



之由垂  
戒切矣

冬公如晉衛侯會公于沓音註

沓地  
闕

狄侵衛

十有二月己丑公及晉侯盟公還自晉鄭伯會公于棗

音註

棗鄭地音吠又音匪○楚次厥貉而晉遂不競於  
是公朝晉衛侯會公公還自晉鄭伯會公諸夏之

懼甚

矣

戊頃王六年崩子班嗣位是  
申為匡王春秋皆不書崩葬

十有四年

晉靈公八年齊昭二  
十年衛成二十

二蔡莊三十三鄭穆十五曹文五陳靈公平國元  
年杞桓二十四宋昭七秦康八楚莊王旅元年

春王正月公至自晉

邾人伐我南鄙叔彭生帥師伐邾

夏五月乙亥齊侯潘卒

昭公卒  
子舍立

六月公會宋公陳侯衛侯鄭伯許男曹伯晉趙盾癸酉

同盟于新城

音註  
新城  
宋地

同盟于新城同外楚也其曰同者志諸侯同欲非強之也而宋公陳侯鄭伯在焉則知楚次厥貉三國雖從誠有弗獲已者削而不書蓋怨之也蔡不與盟果有背華即夷之實矣夷考晉楚行事未有以大相遠也而春秋予奪如此者荆楚僭王若與同好陵蔑中華是將代宗周為共主君臣之義滅矣可不謹乎

音註

強上聲與音  
預背音佩

秋七月有星孛入于北斗音註

孛音佩

孛者惡氣所生闇亂不明之貌也入于北斗者斗有環域天之三辰綱紀星也宋先代之後齊晉天子方伯中國紀綱彗者所以除舊布新也禎祥妖孽隨其所感先事而著後三年宋弑昭公又二年齊弑懿公又二年晉弑靈公此三君者皆違道失德而死於亂符叔服之言天之示人顯矣史之有占明矣

公至自會

晉人納捷菑于邾弗克納音註

菑側其反

邾文公元妃齊姜生定公二妃晉姬生捷菑文公卒邾人立定公捷菑奔晉趙盾以諸侯之師八百乘納

捷苗于邾邾人辭曰齊出糴且長宣子曰非吾力不能納也義實不爾克也引師而去之故君子善之而書曰弗克納也在易同人之九四曰乘其墉弗克攻吉象曰乘其墉義弗克也其吉則因而反則也其趙盾之謂矣聖人以改過為大過而不改將文過以遂非則有怙終之刑過而能悔不貳過以遠罪則有遷善之美其曰弗克納見私欲不行可以為難矣然則何以稱人大夫而置諸侯非也聞義能徙故為之諱內以諱為貶音註且平聲文去聲外以諱為善見音現為去聲

## 九月甲申公孫敖卒于齊

### 齊公子商人弑其君舍音註

商人弑舍自立是為懿公

州吁弑君則以國氏商人獨稱公子何也以國氏者累及乎上稱公子者誅止其身夫州吁寵愛有匹嫡

奪正之漸莊公養成其惡而莫之禁至於弑逆則有以致之矣故曰以國氏者累及乎上按左氏魯叔姬妃齊昭公生舍叔姬無寵舍無威商人心知其孤危寡特可以取而代也於是驟施於國而多聚士然則商人弑逆出於其身之所為而非昭公有以致之也故曰稱公子者誅止其身舍未踰年而成之為君者穀梁子曰成舍之為君所以重商人之弑也

音註

累劣偽反妃音配施式鼓反

宋子哀來奔音註

子哀即高哀也

宋昭公無道高哀為蕭封人以為卿不義宋公而出遂來奔書曰子哀貴之也易曰幾者動之微吉之先見者也君子見幾而作不俟終日宋子哀有焉昔微子去紂列于三仁之首子哀不立于危亂之邦而春秋書字謂能貴愛其身以存道也若偷生避禍而去國出奔亦何取之有

冬單伯如齊齊人執單伯音註

單伯周卿士單音善○諸侯無執王使之義故

不依行人例

齊君舍魯之甥也商人弑舍固忌魯矣魯使單伯如齊齊人意欲辱魯故執單伯并子叔姬而誣之以罪不稱行人公羊所謂以已執之者也

齊人執子叔姬音註

子叔姬魯女

子叔姬者齊君舍之母也弑其君執其母皆商人所為而以為齊人執之何也商人弑君之罪已顯而齊人黨賊之惡未彰商人驟施於國而多聚士是以財誘齊國之人而濟其惡也齊人懷商人之私惠忘君父之大倫弑其君而不能討執其母而莫之救則是舉國之人皆有不救之罪也假有人焉正色而立於

朝誰敢致難其君與執其母而不之顧乎故聖人書曰齊人執于叔姬所以窮逆賊之黨與而治之也其討罪之旨嚴矣故曰春秋成而亂臣賊子懼

**音註**

施去聲 難去聲

已匡王

**十有五年**

晉靈公齊懿公商人元年衛成二十三年蔡莊三十四卒鄭穆十六曹文六

陳靈二杞桓二十五宋

昭八秦康九楚莊二

**春季孫行父如晉音註**

季孫行父魯大夫即季文子也

**三月宋司馬華孫來盟音註**

華孫即華耦為華督孫故稱華孫

司馬主兵之官稱華孫者自督弑殤公諸侯受昭失賊不討使秉宋政及其後世繼掌兵權春秋之所禁者故傳載其承命亞旅之詞而經書曰宋司馬華孫來盟其曰華孫猶季孫叔孫仲孫臧孫之類不書名

者義不繫於名也不稱使以是專行為無君矣孟子  
曰所謂故國非謂其有喬木有世臣之謂也春秋此  
義其欲後世以賢者之類功臣音註傳去  
之冑為世臣然後委之以政乎聲

## 夏曹伯來朝

### 齊人歸公孫敖之喪音註

大夫與還小書善魯或子以  
敖父教公族之恩崇仁孝之

教故特錄教  
喪歸以示義

公孫敖慶父之後行又醜矣出奔他國其卒與喪歸  
皆書于策者許翰以謂文伯惠叔二子之哀誠無已  
也故魯人從其請國史記其事仲尼因而不草者以  
教著教也易曰有子考元咎周公命蔡仲曰爾尚蓋  
前人  
之愆



六月辛丑朔日有食之鼓用牲于社

單伯至自齊

單伯天子之命大夫也故逆王姬會伐宋使于齊皆書其字致而不名與意如媼異者無所書而不尊王命謹臣

音註

使去聲媼

敕略反

晉卻缺帥師伐蔡戊申入蔡音註

入國書大夫於是始是故自伐書陽處父

入書卻缺侵書趙穿

由是凡役書大夫

秋齊人侵我西鄙

季孫行父如晉

# 冬十有一月諸侯盟于扈

盟于扈者晉侯宋公衛蔡陳鄭曹許八國之君也何以不序略之也春秋於夷狄君臣同詞而不分爵號說者以為略之也八國曷為畧之等於夷狄乎齊人弑君不能致討受賂而退奚以賢於狄矣不曰晉人會諸侯盟于扈而曰諸侯盟者分惡於諸侯也陳恒弑其君孔子沐浴而朝告於哀公請討之弑君之賊夫人之所得討也而況諸侯乎況於鄰國乎略諸侯而不序以其欲討齊罪而復不能也況於鄰壤初不與盟會者乎魯君音註號去聲復之罪亦可知也扶又反

## 十有二月齊人來歸子叔姬

不言齊子叔姬來歸而曰齊人來歸子叔姬者見子叔姬無罪齊人自絕而歸之爾春秋深罪齊人以商

人為君而不知其惡故其執其歸與弑其君商人皆稱齊人深責之也

音註

見音現

齊侯侵我西鄙遂伐曹入其郛音註

郛音孚○兵事言遂必天下之大故

也此言遂伐曹以齊始

敗夏盟晉遂不競也

庚匡王

十有六年

晉靈十齊懿二衛成二十四蔡文公申元年鄭穆十七曹文七陳靈三杞

桓二十六年宋昭九

弑秦康十楚莊三

春季孫行父會齊侯于陽穀齊侯弗及盟音註

陽穀齊地

夏五月公四不視朔

天子班朔于諸侯諸侯每月奉以告廟出視朝政文公四不視朔公羊子以為有疾也不言疾自是公無

疾不視朔也此見聖人所書之意若後復視朔者必於此書公有疾與昭公如晉之事比矣文公厭政備見于經閏不告朔不視無雨不閏會同不與廟壞不修作主不時事神治民之急也則其心放而不知求矣久矣

六月戊辰公子遂及齊侯盟于鄆丘音註

鄆丘齊地或作犀丘鄆音

西又音妻

秋八月辛未夫人姜氏薨音註

姜氏僖公夫人文公母也

毀泉臺音註

泉臺即郎臺也

先祖為之非矣然臺之存毀非安危治亂之所繫也雖勿居可也而必毀之是暴揚其失有輕先祖之心

此履霜之漸弑父與君之萌春秋之所謹也故書

楚人秦人巴人滅庸音註

庸東南小國

楚大饑戎與麋濮交伐之而庸人幸其弱帥羣蠻以叛楚此取滅之道也楚人謀徙於阪高蔣賈曰不可我能往寇亦能往不如伐庸亦見其謀國之善矣故列書三國而楚不稱師滅楚之罪詞也

音註

阪音反為

于委反

冬十有一月宋人弑其君杵臼音註

昭公弑弟文公鮑立

此襄夫人使甸殺之也而書宋人者昭公無道國人之所欲弑也君無道而弑之可乎諸侯殺其大夫雖當於罪若不歸司寇猶有專殺之嫌以為不臣矣況於北面歸戴奉之以為君也故曰人臣無將將而必

誅昭公無道聖人以弑君之罪歸宋人者以明三綱  
人道之大倫君臣之義不可廢也然則有土之君可  
以肆於民上而無誅乎諸侯無道天子方伯在焉臣  
子國人其何居死於其職而明於去就從違之義斯  
可矣蕩意諸亦死職春秋削之不得班於孔父仇牧  
荀息何也三子聞其君而見殺春秋之所取也意諸  
知國人將弑其君而不能止知昭公之將見殺而不  
能正坐待其及而死之所謂匹夫匹婦自經於溝瀆  
而莫之知也奚得與死於其職者比乎聖

**音註**

當去聲居

基音

辛匡王十有七年

晉靈十一齊懿三衛成二十五蔡文  
二鄭穆十八曹文八陳靈四杞桓二

十七宋文公鮑元年

秦康十一楚莊四

春晉人衛人陳人鄭人伐宋音註

自閔僖以至終於春秋陳侯常在衛侯上

今大夫會在衛下傳不言陳公孫寧後至則寧位非上卿故也

列國之卿其君所與共天位治天職者宋有弒君之亂欲行天討而伐宋乃其職也復不能討而成其亂是不足為國卿失其職矣故皆貶而稱人大夫帥師稱名氏賤者窮諸人其稱人賤之也陳恒弒簡公孔子請討曰以吾從大夫之後不敢不告也

夏四月癸亥葬我小君聲姜音註

聲姜文公之母或作聖姜

齊侯伐我西鄙

六月癸未公及齊侯盟于穀

# 諸侯會于扈

宋昭公雖為無道人臣將而必誅春秋正宋人為弑君之罪所以明人道之大倫也故大夫無沐浴之請則貶而稱人諸侯無討賊之功則略而不序不然是廢君臣之義人欲肆而天理滅矣故曰春秋成而亂臣賊子懼

## 秋公至自穀

## 冬公子遂如齊

壬匡王  
子四年  
十有八年

晉靈十二齊懿四  
莒莒成二十六  
蔡文三鄭穆十九  
曹文九陳靈五  
杞桓

二十八  
宋文二  
秦康十二  
卒楚莊五



春王二月丁丑公薨于臺下

秦伯瑩卒音註

康公卒子共  
公立瑩音鶯

夏五月戊戌齊人弑其君商人音註

懿公弑兄  
惠公元立

按左氏齊懿公即位則邴歆之父而使歆僕納閭職之妻而使職駟乘二人者實弑懿公然則於法宜書曰盜而特變其詞以為齊人何也亂臣賊子之動於惡必有利其所為而與之者人人不利其所為而莫之與則孤危獨立無以濟其惡篡弑之謀熄矣惟利其所為而與之者衆是以能濟其惡天下胥為禽獸而莫之遏公子商人驟施於國而多聚士盡其家而貸於公有司是以財誘齊國之人也齊人貪公子一時之私施不顧君臣萬世之大倫弑其國君則覲面以為之臣而不能討執其君母則拱手以聽其所為

而不能救故於懿公見殺特不書盜反以弑君之罪歸諸齊人以誅亂賊之黨弭篡弑之漸所謂拔本塞源懲禍亂之所由也故曰

**音註**

邠音丙歎音觸盡津忍反貨音忒

六月癸酉葬我君文公

秋公子遂叔孫得臣如齊

使舉上客將稱元帥此春秋立文之常體也其有變文書介副者欲以起問者見事情也子赤夫人之子今卒于弑不著其實是為國諱惡無以傳信于將來而春秋之大義隱矣故上書大夫並使下書夫人歸于齊中曰子卒則見禍亂邪謀發於奉

**音註**

為去聲使去聲

冬十月子卒

**音註**

子謂子赤也

諸侯在喪稱子繼世不忍當也既葬不名終人子之事也踰年稱君緣民臣之心也子卒何以不日遇弑不忍言也既葬而不名不名而遇弑者不日以見其弑子亦是也踰年而稱君稱君而遇弑者不地以見其弑閔公是也何以知其弑乎上書大夫並使下書于卒夫人歸則知罪之在公子遂矣孫子邾出奔莒則知罪之在夫人與慶父矣繼世之恩終事之重情文之節隱惡之禮記事之信誅亂臣討賊子之義備矣

音註

使去聲

夫人姜氏歸于齊音註

姜氏齊姜即哀姜也

書夫人則知其正書姜氏則知其非見絕於先君書歸于齊則知其無罪異於孫子邾者而魯國臣子殺適立庶敬羸宣公不能事主君存適母其罪不書而並見矣

音註

適音嫡見音現

季孫行父如齊

莒弑其君庶其音註

稱君名  
無道也

春秋傳卷十五



覆校官檢討臣季學錦

校對官修撰臣張書勲

謄錄監生臣施昌華

謄錄監生臣繆謨

謄錄舉人臣彭希韓

欽定四庫全書薈要

經部

春秋傳說卷十六至十九



春秋傳卷十六

宋 胡安國 撰

宣公上

公名倭一名接又作委文公子  
母敬嬴謚法善問周達曰宣

周

莊王五年魯宣公二  
年匡王崩弟定王立

鄭

穆公二十年魯宣公三年穆公卒靈  
公夷立宣四年靈公弒弟襄公堅立

齊

惠公元年魯宣公十年  
惠公卒子頃公無野立

宋

文公  
三年

晉

靈公繼霸十三年趙盾為政魯宣公二年靈公弒成  
公黑臀立宣八年卻缺為政宣九年成公卒子景公



孺立宣十一年荀林父為政宣十六年士會為政宣十七年卻克為政

音註

孺乃侯反

衛

成公二十七年魯宣公九年成公卒子穆公速立

蔡

文公四年魯宣公十七年文公卒子景公固立

曹

文公十年魯宣公十四年文公卒子宣公廬立

陳

靈公六年魯宣公十年靈公弒子成公午立

杞

桓公二十九年

薛

詳見僖公元年

呂

季佗元年

邾

定公六年

許

昭公十四年魯宣公十七年昭公卒靈公立

小邾

詳見僖公元年

楚

莊王六年魯宣公十一年盟辰陵討陳春秋始予楚莊王以霸宣十一年楚孫叔敖為令尹宣十二年敗

晉於邲宣十八年莊王卒子共王立

秦

共公元年魯宣公四年共公卒桓公立

吳

詳見隱公元年及成公元年

越

詳見隱公元年

癸匡王元年

晉靈十三年齊惠公元年衛成二十七年  
蔡文四年鄭穆二十年曹文十年陳靈六

年杞桓二十九年宋文公三  
年秦共公福元年楚莊六年

春王正月公即位

宣公為弑君者所立受之而不討賊是亦聞乎弑也  
故如其意焉而書即位以著其自立之罪而不嫌於  
同辭美一也有小大則褒詞異惡一也  
有小大則貶詞異一美一惡無嫌於同

公子遂如齊逆女音註

尊君命也

魯秉周禮喪未期年遣卿逆女何亟乎太子赤齊出  
也仲遂殺子赤及其母弟而立宣公懼於見討故結  
昏于齊為自安計越典禮以逆之如此其亟而不顧  
者必敬嬴仲遂請齊立接之始謀也其後滕文公定

為三年喪父兄百官皆不欲曰吾宗國魯先君莫之行也喪紀浸廢夫豈一朝一夕之故自文宣莫之行矣此所謂不待貶絕而罪惡見者也

三月遂以夫人婦姜至自齊音註

尊夫人也

有不待貶絕而罪惡見者不貶絕以見惡夫人與有罪焉則待貶而後見故不稱氏夫人其如何知惡無禮如野有死麕能以禮自防如草蟲愆期有待如歸妹之九四則可免矣凡稱婦者其詞雖同立義則異逆婦姜於奔病文公也以婦姜至自齊責敬嬴也敬嬴嬖妾私事襄仲以其子屬之殺世適兄弟出主君夫人援成風故事即以子貴為國君毋斬焉在衆服之中請昏納婦而其罪隱而未見也故因夫人至特稱婦姜以顯之此乃春秋推見至隱著妾母當國用事為後世鑒者也槩指為有姑之詞而不察其旨則

精義音註屬音  
隱矣

# 夏季孫行父如齊

經書行父如齊而不言其故謂納賂以請會者傳也  
經有不待傳而著者比事以觀斯得矣下書公會齊  
侯於平州則知此會行父請之也又書齊人取濟西  
田則知其請蓋以賂也雖微傳其事著矣諸侯立卿  
為公室輔猶屋之有樞也而謀國如此亦不待貶絕  
而惡自見者也不然以行父之勤勞恭儉相三君而  
無私積必能以其君  
音註 積子賜反相三君而無  
顯名與晏嬰等矣 私積事見襄公五年

# 晉放其大夫胥甲父于衛

放猶羈置母去其所比於專殺者其罪薄乎云爾或  
以為近正非矣大夫當官既不請於天子而自命以

為有罪又不告於司寇而擅刑猶不遠於正乎秦晉戰於河曲撓史駢之謀者趙穿也若討其不用命則當以穿為首止治軍門之呼偕貶可也而獨放胥甲父則以趙盾當國穿其族子而盾庇之也桃園之罪其志固形於此矣故稱國以放見晉  
音註呼去聲止政之在私門而成上侵為後戒也  
音註治軍門之呼事見左傳  
文公十二年

# 公會齊侯于平州音註

平州齊地

按左氏曰會于平州以定公位魯宣篡立踰年舉國臣子既從之矣若之何位猶未定而有待於平州之會也春秋以來弑君篡國者已列於諸侯則不復致討故曹人以此請負芻於晉夫篡弑之賊毀滅天理無所容於天地之間身無存沒時無古今其罪不得赦也以列於會而不復討是率天下而為無父無君

之人矣此仲尼所為懼春秋所以作也然欲定其位者魯宣宜稱及齊而曰會者討賊之法也凡討亂臣賊子必深絕其黨

**音註**

請負芻於晉事見左氏成公十六年

### 公子遂如齊

宣公篡立之罪仲遂主謀為首惡初請于齊遂為上客而並書介使者罪叔孫得臣不能為有無亦從之也大夫有以死爭者矣然削而不書者以叔仲惠伯死非君命失其所也遂及行父則一再見於經矣如齊拜成雖削之可也又再書於策者於以著其始終成就裁立之謀以戒後世人臣或內交宮禁以固其寵或外結藩鎮以為之援至於生殺廢置皆出其手而人主不悟者其慮深矣凡此皆直書於策而義自見者也

### 六月齊人取濟西田音註

濟西魯故地僖公取之曹者

魯人致賂以免討而書齊人取田者所以著齊罪春秋討賊尤嚴於利其為惡而助之者所以孤其黨夫齊魯鄰國盟主之餘業也子惡弑出姜歸而宣公立不能聲罪致討務寧魯亂首與之會是利其為惡而助之也弑君篡國人道所不容而貨賂公行免於諸侯之討則四隣諸侯胥為無父無君之輩其禍乃自不知以義為利而以利之可以為利而為之也孟子為梁王極言利國者必至於弑奪而後廢蓋得經書取田之意舉法如此然後人知保義棄利亂臣賊子孤立無徒而亂少弭矣

## 秋邾子來朝

### 楚子鄭人侵陳遂侵宋音註

侵蔡遂伐楚以見齊伯侵陳遂侵宋以見楚伯

楚書爵而人鄭者貶之也鄭伯本以宋人弑君晉不能討受賂而還以此罪晉為不足與也遂受盟于楚



今乃附楚以亞病中國何義乎書侵陳遂侵宋者以見潛師掠境肆為侵暴非能聲宋罪而討之也既正此師為不義然後音註去中國之師可舉矣聲

晉趙盾帥師救陳音註

於是楚始伯

鄭在王畿之內而附蠻夷陳先代帝王之後而見侵逼此門庭之寇利用禦之者也晉能救陳則存諸夏攘夷狄之師豈特褒而書救凡書救者未有不善之也如解倒懸如拯民於塗炭之中知此義則知春秋用兵之意矣傳稱師救陳宋經不書宋此非闕文乃聖人削之也前方以不能討宋上卿貶而稱人諸侯會而不序今若書救宋則典刑紊矣

宋公文陳侯靈衛侯成曹伯文會晉師於棐林伐鄭音

註

此趙盾也大夫而用諸侯之師於是始其  
曰會晉師則不與大夫用諸侯之辭也

列數諸侯而會晉趙盾穀梁子以為大趙盾之事以  
其大之也故曰師此說非也春秋立法君為重而大  
夫與師其體敵列數諸侯於帥師之下而又書大夫  
之名氏則臣疑於君而不可以為訓其曰會晉師此  
乃謹禮於微之意也其立義精矣裴林鄭地也前者  
地而後伐以為疑詞此其地則以著其美者一美一  
惡無嫌音註數上  
於同聲

冬晉趙穿帥師侵崇音註

崇小國在京兆鄠縣甘亭○  
自伐書陽處父入書卻缺侵

書趙穿而後  
凡役書大夫

崇在西土秦所與也晉欲求成於秦不以大義動之  
而伐其與國則為諉已甚比諸伐楚以救江異矣而

傳謂設此謀者趙穿也意者趙穿已有逆心欲得兵權託於伐國以用其衆乎不然何謀之迂而當國者亦不裁正而從之也穿之姓名自登史策弑君於桃園而上卿以志同受惡其端又見於此書侵以見所以求成者非其道矣

# 晉人宋人伐鄭

宋人弑君既列於會春秋衰世已免諸侯之討矣論春秋王法則其罪固在法所不赦也而晉人與之合兵伐鄭是謂以燕伐燕庸愈乎其書晉人宋人非弑師少蓋敗而人之也以敗書伐者若曰聲罪致討而已有瑕則何以伐人矣

音註

論去聲

甲匡王六年

二年

晉靈十四弑齊惠二衛成二十八蔡文五鄭穆二十一曹文十一陳靈七杞桓

三十宋文四秦  
共二楚莊七

春王二月壬子宋華元帥師及鄭公子歸生帥師戰于

大棘宋師敗績獲宋華元音註

大夫主戰於是始於是凡戰書大夫

兩軍接刃主將見獲其負明矣又書師敗績詞不贅乎此明大夫雖貴與師等也故將尊師少稱將不稱師師衆將卑稱師不稱將將尊師衆並書于策者示人君不可輕役大眾又重將帥之選其義深矣或曰元帥三軍之司命而輕重若是班乎自行師而言則以元帥為司命自有國而言則以得衆為邦本鄭使高克將兵禦狄於境欲遠克也而不恤其將故經以棄師罪卒實從得臣恐喪師也而不恤其將故經以棄師罪鄭以殺其大夫責楚明此義然音註將去聲並後知王者之道輕重之權衡矣音註同遠去聲

# 秦師伐晉

按左氏以報崇也遂圍焦晉用大師于崇乃趙穿私意而無之也故書侵秦人為是興師而報晉則問其無名之罪也故書伐世豈有欲求成於強國而侵其所與可以得成者乎穿之情見矣宣子當國算無遺策獨惜於此哉其從之也而盾之情亦見矣春秋書事筆削因革必有以也一侵一伐而不書圍焦所以誅晉卿上侵之意音註為去聲情莫其所由來者漸矣

# 夏晉人宋人衛人陳人侵鄭

按左氏晉趙盾及諸侯之師侵鄭以報大棘之役初鄭歸生受命於楚以伐宋經不書伐而以宋華元主大棘之戰者蓋楚人有詞於宋矣師之老壯在曲直晉主夏盟盾既當國合諸侯之師何畏乎楚何避乎

關椒然力非不足而去之者以理曲也故卿不氏而  
稱人師書侵而不言伐易於訟卦之象曰君子作事  
謀始始而不謀將至於興師動衆有不能定者矣晉  
惟取賂釋宋而不討至於中國之大不能服鄭不競  
於楚可不慎乎春秋行事必正其  
本為末流之若此也其垂戒明矣

秋九月乙丑晉趙盾弑其君夷臯音註

靈公弑成公黑  
臀立靈公不君

而稱臣以弑者以示良  
史之法深責執政之臣

趙穿手弑其君董狐歸獄於盾其斷盾之獄詞曰子  
為正卿亡不越竟反不討賊以是書斷而盾也受其  
惡而不敢辭仲尼因其法而不之革其義云何曰正  
卿當國任事之臣也國事莫臨於君見弑不於其身  
而誰責乎亡而越竟謂去國而不還也然後君臣之  
義絕反而討賊謂復讐而不擇也然後臣子之事終

不然。是盾偽出而實聞乎故也。假令不與聞者而縱賊不討。是有今將之心而意欲穿之成乎。弑矣。惡莫慘乎。意今以此罪盾。乃開臣子之邪心而謹其漸也。盾雖欲辭而不受。可乎。以高貴鄉公之事觀焉。抽戈者。成濟倡謀者。賈克而當國者。司馬昭也。為天吏者。將原司馬昭之心而誅之乎。亦將致辟成濟而足也。故陳泰曰。惟斬賈克。可以少謝天下耳。昭問其次。意在濟也。泰欲進此直指昭也。然則趙穿弑君而盾為首。惡春秋之大義明矣。微夫子推見至隱。垂法後世。亂臣賊子皆以詭計獲免。而至愚無知如史太鄧扈樂之徒。皆蒙歸獄而受戮焉。君臣父子不相夷。以至於禽獸也。幾希。故曰春秋成而亂臣賊子懼。

註 斷都亂反並  
同樂音洛

冬十月乙亥天王崩

乙定王三年晉成公黑臀元年齊惠三衛成二十九杞

元年文六鄭穆二十二卒曹文十二陳靈八杞

桓三十一宋文五

秦共三楚莊八

春王正月郊牛之口傷改卜牛牛死乃不郊

乃不郊為牛之口傷改卜牛而牛又死也不然郊矣  
禮為天王服斬衰周人告喪於魯史策已書而未葬  
也祀帝于郊夫豈其時而或謂不以王事廢天事禮  
乎春秋以來喪紀浸廢有不奔王喪而遠適他國有  
不修弔禮而自相聘問固將以是為可舉而不廢也  
卒至漢文以日易月後世不能復其所由來漸矣春  
秋備書其義自見

猶三望



三望者公羊曰祭泰山河海夫天子有天下凡宇宙之內名山大川皆其所主也故得祭天而有方望無所不通諸侯有一國則境外之山川他人所主者而可以望乎季氏旅於泰山冉求不能救而夫子責之者為泰山魯侯所主也大夫何與焉季氏不能旅泰山則河海非魯之封內其不得祭亦明矣猶者可已不當為

之詞

音註

為去聲與音預

# 葬匡王

四月而葬王室不君其禮畧也微者往會魯侯不臣其情慢也或曰宣公親之者也而常事不書非矣崩葬始終之大變豈以是為常事而不書也

# 楚子伐陸渾之戎音註

陸渾之戎按地志陸渾戎在秦晉西北允姓之戎居之後為秦

晉遵於伊川逆從  
戎號渾戶門反

夷狄相攻不志此其志何也為陸渾在王都之側戎  
夏雖處族類之不分也楚又至洛觀兵於周疆問鼎  
之大小輕重焉故特書於策  
以謹華夷之辨禁滑夏之階

# 夏楚人侵鄭

按左氏晉侯伐鄭鄭及晉平而經不書者仲尼削之  
也鄭本以晉靈不君取賂釋賊為不足與似也而往  
從楚非矣今晉成公初立背僭竊偽邦而歸諸夏則  
是反之正也春秋大改過許遷善書楚人侵鄭者與  
鄭伯之能反正也故獨著楚人侵掠諸夏  
之罪爾鄭既見侵於楚則及晉平可知矣

# 秋赤狄侵齊音註

赤狄始見經先儒謂唐叔子孫別在  
狄者謂之赤狄白狄俗尚赤衣白衣

也地譜云洛州春秋赤狄之地

# 宋師圍曹

按左氏宋文公即位盡逐武穆之族二族以曹師伐宋然不書於經者二族以見逐而舉兵非討罪也及宋師圍曹報武氏之亂而經書之者端本清源之意也武穆二族與曹之師奚為至於宋哉不能反躬自治恃宋強以報之兵革何時而息也宋惟有不赦之罪莫之治也故書法如此

冬十月丙戌鄭伯蘭卒音註

穆公卒靈公夷立

# 葬鄭穆公

丙定王四年

晉成二齊惠四衛成三十蔡文七鄭靈公夷元年弑曹文十三陳靈九杞桓三十二

宋文六秦共  
四卒楚莊九

春王正月公及齊侯平莒及郕莒人不肯公伐莒取向

音註

郕已姓國音淡今為東海郡向莒邑音餉今為承縣○莒郕二國相怨故公與齊侯共平之

心不偏黨之謂平以此心平物者物必順以此心平怨者怨必釋惟小人不能宅心之若是也雖以勢力強之而有不獲成者矣夫以齊魯大國平郕莒小國宜其降心聽命不待文告之及也然而莒人不肯則以宣公心有所私繫失平怨之本耳故書取以著其罪及所欲也平者成也取者盜也不肯者心弗允從莫能強之者也以利心圖成雖強大不能行之於弱小春秋書此戒後世之不知治其本者故行有不得者反求諸己斯可矣

秦伯稻卒音註

共公卒桓公立

夏六月乙酉鄭公子歸生弑其君夷音註

靈公弑弟襄公堅立

首謀弑逆者公子宋也懼譖而從之者歸生也而以歸生為首惡何也夫亂臣賊子欲動其惡而不從者未有能全其身而不死也故季子然問仲由冉求其從之者歟子曰弑父與君亦不從也是以死節許二子矣歸生懼譖而從公子宋特無求路不可奪之死節耳書為首惡不亦過乎曰歸生與宋並為大夫乃貴戚之卿同執國政可以不從一也嘗統大帥與宋戰獲其元帥已得兵權可以不從二也聞宋逆謀登時而覺先事誅之猶反手耳夫據殺生之柄伏大義以制人使人聽已猶犬羊之伏於虎也何畏於人懼其見殺而從之也哉計不出此顧以畜老憚殺比方君父歸生之心悖矣故春秋捨公子宋而以弑君之

罪歸之為後世鑒若司馬亮沈慶之等苟知此義則能討罪人不至於失身為賊所制矣

# 赤狄侵齊

## 秋公如齊公至自齊

君行告至常事不書宣公比年如齊而皆致者危之也夫以篡弒謀於齊而取國以土地賂齊而請會以卑屈事齊而求安上不知有天王下不知有方伯惟利交是奉而可保乎高固之事亦殆矣故比年如齊而皆致以戒後世之欲利有攸往者惟義之與比為可安耳

音註

比去聲  
夫平聲

## 冬楚子伐鄭

丁定王五年

晉成三齊惠五衛成三十一蔡文八鄭襄公堅元年曹文十四陳靈十杞桓三十三

宋文七秦桓公  
榮元年楚莊十

春公如齊

夏公至自齊

秋九月齊高固來逆子叔姬音註

高固齊大夫

按左氏公如齊高固使齊侯止公請叔姬焉書夏公至自齊秋齊高固來逆子叔姬罪宣公也其曰來者以公自為之主稱子者或謂別於先公之女也諸侯嫁女於大夫主大夫以與之者為體敵也而公自為之主壓尊毀列卑朝廷慢宗廟矣夫以鄭國褊小楚公子圍之貴驕強大來娶于鄭子產辭而却之使館於外欲野賜之費不得撫有其室而宣公以魯國周公之後逼於高固請婚其女強委禽焉而不能止惟

不知以禮為守身之幹是以得此辱也春秋詳書為後世鑒欲人之必謹於禮以定其位不然卑巽妄說不近於禮奚音註幾不得撫有其室事足遠耻辱哉見左傳昭公元年

## 叔孫得臣卒

內大夫卒無有不日者以春秋魯史也其或不日則見恩數之畧爾仲遂如齊謀弑子赤叔孫得臣與之偕行在宣公固有援立之私其恩數豈畧而不書日是聖人削之也君臣父子妃妾適庶人道之大倫也方仲遂以殺適立庶往謀於齊而與得臣並使也若懵然不知其謀或知之而不能救則將焉用彼相矣春秋治子赤之事專在仲遂以其內交宮禁外結強鄰大惡無所分也而叔孫得臣有同使於齊之罪故特不書日以貶之若曰大夫而不音註見音能為有無者不足加以恩數云爾音註現



冬齊高固及子叔姬來

左氏曰反馬也禮嫁女留其送馬不敢自安及廟見成婦遣使反馬則高固親來非禮也又禮女子有行遠父母者歲一歸寧今見逆逾時未易歲也而叔姬亟來亦非禮也故書及書來以著齊罪也大夫適他國必有君命與公事否則禮法之所禁而可犯乎惠公許其臣越禮恣行而莫遏高固委其君踰境自如而不忌則人欲已肆矣凡婚姻常事不書而書此者則以為非常為後世戒也

楚人伐鄭

戊定王六年晉成四齊惠六衛成三十二蔡文九鄭襄  
午四年二曹文十五陳靈十一杞桓三十四宋文

八秦桓二  
楚莊十一

# 春晉趙盾衛孫免侵陳

按傳稱陳及楚平荀林父伐陳經皆不書者以下書晉衛加兵於陳即陳及楚平可知矣以趙盾孫免書侵即林父無詞可稱亦可知矣愛人不親反其仁治人不治反其智晉嘗命上將帥師救陳又再與之連兵伐鄭今而即楚無乃於已有闕蓋亦自反可也不內省德遽以兵加之則非義矣故林父不書伐而盾免書侵以正晉人所音註傳去  
以免主盟非其道也

## 夏四月

## 秋八月螽

傳謂螽為穀灾虐取於民之效也先是公伐莒取向後再如齊伐萊軍旅數起賦斂既繁戾氣應之矣夫

善惡之感萌於心而災祥之應見於事宣公不知舍  
惡遷善以補前行之愆而用兵不息災異數見年穀  
不豐國用空乏卒至於改助法而稅民蓋自此始矣  
經於螽螟一物之變必書于策示後世天人感應之  
理不可誣當慎其所感也

冬十月

春秋傳卷十六

春秋傳卷十七

宋 胡安國 撰

宣公中

已定王七年

晉成五齊惠七衛成三十三蔡文十鄭襄  
三曹文十六陳靈十二杞桓三十五宋文

九秦桓三  
楚莊十二

春衛侯使孫良夫來盟

來盟為前定者嘗有約言矣未足効信而釋疑又相  
軟血固結之爾是盟衛欲為晉致魯而魯專事齊初  
未與晉通也必有疑焉而衛侯任其無咎故遣良夫  
來為此盟而公卒見辱盟非春秋之所貴義自見矣

夏公會齊侯伐萊音註

萊東方小國

秋公至自伐萊大旱

及者內為志會者外為主平莒及邾公所欲也故書及繼以取向即所欲者可知矣伐萊齊志也故書會繼以伐致即師行之危亦可知矣公與齊侯俱不務德合黨連兵恃強陵弱是以為此舉也軍旅之後必有凶年言民以征役怨咨之氣感動天變而旱乾作矣其以大旱書者或不雩或雖雩而不雨也不雩則無恤民憂國之心雩而不雨格天之精意闕矣

冬公會晉侯宋公衛侯鄭伯曹伯于黑壤音註

黑壤晉地一名

父黃

會而不得見不以不得見為諱盟而不與盟不以不與盟為諱則曲不在公而主會盟者之罪耳與於會不與於盟而公有歎焉非主會盟者之過也則書會不書盟若黑壤是也晉侯之立公既不朝又不使大夫聘而每歲適齊是宣公行有不慊於心而非晉人之咎笑凡不直者臣為君隱子為父隱於以養臣子愛敬之心而不事盟主又

音註

與音預並同朝音潮

以賂免則不直在己矣

庚定王八年

晉成六齊惠八衛成三十四蔡文十一鄭襄四曹文十七陳靈十三杞桓三十六宋

文十秦桓四

楚莊十三

春公至自會

夏六月公子遂如齊至黃乃復音註

黃齊地

至黃乃復壅君命也有疾亦不復可乎大夫以君命出聞喪徐行而不返未致事而死以尸將事楚伐吳陳侯使公孫貞子往弔及良而卒將以尸入吳人辭焉上介芊尹蓋曰寡君使蓋備使弔君之下吏無祿使人逢天之慝大命隕墜絕世於良廕日供積一日遭次今君命逆使人曰無以尸造於門是我寡君之命委於草莽也無乃不可乎吳人不敢辭君子

音註

以為知禮乃者無其上之詞其曰復事未畢也  
使去聲  
並同

辛巳有事於大廟仲遂卒于垂音註

大音泰  
垂齊地

有事言時祭此公子遂也曷為書字生而賜氏俾世其官也曷為書卒以事之變卒之也古者諸侯立家大夫卒而賜氏其後尊禮惟臣寵遇貴戚而不由其道於是乎有生而賜氏其在魯則季友仲遂是也襄

仲殺惡及視拔立宣公而宣公深德之故生而賜氏  
使世大夫以答之也經於其卒書族以志變法之端  
為後世戒

壬午猶繹萬入去籥音註

去起呂反  
籥羊畧反

繹者祭之明日以賓尸也猶者可已之詞萬舞也以  
其無聲也故入而遂用籥管也以其有聲也故去而  
不作是謂故知不可存其邪心而不能格也禮大夫  
卒當祭則不告終事而聞則不繹不告者盡肅敬之  
誠於宗廟不繹者全始終之思於臣子今仲遂國卿  
也卒而猶繹則失寵遇大臣之禮矣春秋雖隆君抑  
臣而體貌有加焉則廉陞益尊而臣節礪後世法家  
專欲隆君而不得其道至於犬馬國人相視大倫滅  
矣聖人書法如此  
存君臣之義也



戊子夫人嬴氏薨音註

嬴氏宣公母也

敬嬴文公妾也何以稱夫人自成風聞季友之繇事友而屬其子及僖公得國立以為夫人於是乎嫡妾亂矣春秋於風氏凡始卒四貶之則禘於大廟秦人歸祫榮叔含賻召伯會葬去其姓氏不稱夫人王再書而無天是也敬嬴又嬖私事襄仲而屬宣公不待致於大廟援例以立則從同同而無貶矣其意若曰以義起禮為可繼苟出於私音註繇直情而非義後雖欲正可若何音註繇直救反

晉師白狄伐秦音註

白狄始見經

晉主夏盟糾合諸侯據夷狄安諸夏乃其職矣秦人之怨起自侵崇其曲在晉責已可也既不知自反釋怨修睦以補前過已可咎矣乃復興師動眾會戎狄以伐之獨不惡傷其類乎直書于策貶自見矣

楚人滅舒蓼音註

舒蓼二國名地譜上義陽之蓼先已滅於楚此即如舒鳩舒庸蓋羣舒別

種非二國也

按詩稱戎狄是膺荆舒是懲在周公所懲者其自相攻滅中國何與焉然春秋書而不削者是時楚人疆舒蓼及滑汭盟吳越勢益強大將為中國憂而民有被髮左衽之患矣經斷世者當以為懼有攘却之謀而不可忽則聖人之意也

秋七月甲子日有食之既

冬十月己丑葬我小君敬嬴音註

敬嬴敬謚嬴姓也

成風薨以夫人葬以小君將祔於廟而始有二夫人也則四敗之以正其事今敬嬴亦薨以夫人葬以小

君使耐於廟無貶以正之從司同可也而於宣公元年即以所逆穆姜婦之何也曰婦有姑之詞見敬嬴遂以子貴援例而亟立為夫人也僖公享國八年然後致成風而敬嬴之亟也雖云援例魯君臣之責亦可知矣無貶而書法若此者

音註耐音

附

# 雨不克葬庚寅日中而克葬

敬嬴以其子宣公屬諸襄仲殺太子及其母弟雖假手於仲實敬嬴之謀也經書子赤卒夫人姜氏歸于齊其文無貶而讀者有傷切之意焉則以秉彜不可減也傳謂哭而過市市人皆哭敬嬴逆天理拂人心之狀慘矣其於終事而不克葬著咎徵焉而謂無天道乎此皆直書以見人心與天理之不可誣者也夫喪事即速有進無退浴於中雷飯於牖下小斂於戶內大斂於阼階殯於客位遷於廟祖於庭壙於墓以

弔賓則其退有節以虞事則其祭有時不為雨止禮也雨不克葬喪不以制也或曰卜葬先達日所以避不懷也諸侯相朝與旅見天子入門而雨霑服失容則廢制送終大事人情所不忍遽者反可冒雨不待成禮而葬乎潦車載簋笠士喪禮也有國家者乃不能為雨備何也且公庭之於墓次其禮意固不同矣不得不可以為悅無財不可以為悅得之為有財古之人皆用焉而不能為之備是儉其親也不亦薄乎故穀梁子曰雨不克葬喪不以制也厚葬古人之所戒而墨之治喪也以薄又君子之所不與故喪事以制春秋音註雷力救反塤通

之旨也

音註

鄧反下棺也

城平陽音註

今泰山有平陽縣

楚師伐陳

辛定王九年

晉成七卒齊惠公九衛成三十五卒蔡文  
十四鄭襄五曹文十八陳靈十四杞桓三

十七宋文十一秦  
桓五楚莊十四

春王正月公如齊公至自齊

夏仲孫蔑如京師

以淺言之屬辭比事春秋教也當歲首月公朝於齊  
夏使大夫聘於京師此皆比事可致不待貶絕而惡  
自見者也宣公享國九年於周纔一往聘其在齊則  
又再朝矣經於如齊每行必致深罪之也下逮戰國  
周衰甚矣齊威王往朝於周而天下皆賢之況春秋  
時乎而宣公不能也故聘覲之禮廢則君臣之位失  
諸侯之行惡而倍畔侵陵之貶起矣此經書君  
如齊臣如周之意而特書王正月以表之也

齊師伐萊音註

萊從齊之小國

秋取根牟音註

東夷國也取言公不言公非公命也自宣而下征伐在大夫矣

八月滕子卒音註

昭公卒文公立

九月晉侯宋公衛侯鄭伯曹伯會于扈晉荀林父帥師

伐陳音註

扈鄭地

按左氏討不睦也陳侯不會荀林父以諸侯之師伐陳晉侯卒乃還則知經所書者與晉罪陳之詞也會於扈以待陳而陳侯不會然後林父以諸侯之師伐之也則幾於自反而有禮矣不書諸侯之師而曰林父帥師者在會諸侯皆以師聽命而林父兼將之也則其衆輯矣晉主夏盟又嘗救陳所宜與也而惟楚

之即夫  
豈義乎

辛酉晉侯黑臀卒於扈音註

成公卒子景公孺立

冬十月癸酉衛侯鄭卒音註

成公卒子穆公速立

晉成公何以不葬魯不會也衛成公何以不葬亦魯不會也衛成事晉甚謹而魯宣公獨深向齊衛欲為晉致魯故謀黑壤之會而特使孫良夫來盟以定之也及會於黑壤而晉人止公賂然後免是以扈之會皆前日諸侯而魯獨不往二國繼以喪赴亦皆不會此所謂無其事而闕其文者也或曰二君皆有貶焉故不書葬誤矣魯人不會亦無貶乎書卒而以私怨廢禮忘親其罪已見春秋文簡而直視人若日月之無私照也曲生意義失之遠矣音註為去聲見音現

# 宋人圍滕

圍國非將卑師少所能辦也必動大衆而使大夫為主帥明矣然而稱人是貶之也滕既小國又方有喪所宜矜哀弔恤之不暇而用兵革以圍之此事以觀知見貶之罪在不仁矣

音註

將去聲  
比音彼

## 楚子伐鄭晉卻缺帥師救鄭

楚兵加鄭穀矣或稱人或稱爵何也鄭自晉成公初立舍楚而從中國正也楚人為是興師而加鄭不義矣故宣公三年書人書侵罪之也次年鄭公子歸生弑其君諸侯未有聲罪致討者而楚師至焉故特書爵與之也然興師動衆賊則不討惟服鄭之為事則非義舉矣故又次年傳稱楚子伐鄭而經書人再敗之也至是稱爵豈與之乎按公羊例君將不言帥師書其重者也至此書爵見其陵暴中華以重兵臨鄭



矣何以知其非與之乎曰下書晉卻缺帥師救鄭則知其非與之也由此觀春秋書法皆欲治亂賊之黨謹華夷之辨以一字為褒貶深切著明矣

陳殺其大夫洩冶音註

洩音池治音也

稱國以殺者君與用事大臣同殺之也稱其大夫則不失官守而殺之者有專輒之罪矣洩冶無罪而書名何也治以諫殺身者也殺諫臣者必有亡國弑君之禍故書其名為徵舒弑君楚子滅陳之端以垂後戒此所謂義係於名而書其名者也比干諫而死子曰商有三仁焉洩冶諫而死何獨無褒詞夫語默死生當其可而止爾洩冶之盡言無隱不愧乎史魚之直矣方諸比干自靖自獻於先王則未可同日而語也治雖效忠其猶在宋子哀魯叔肝之後乎故仕於昏亂之朝若異姓者如子哀潔身而去可也其貴戚

耶不食其祿音註當去聲  
如叔肝善矣

壬定王十年晉景公孺元年齊惠十年衛穆公速元年  
戌八年蔡文十三鄭襄六曹文十九陳靈十五

杞桓三十八宋文十  
二秦桓六楚莊十五

# 春公如齊公至自齊

此亦如齊亦致其至而不書月上九年亦如齊亦致其至而書月者為是年夏使仲孫蔑如京師故特於歲首書王正月以著宣公之罪而君臣名分之際謹嚴如此也歸田以為私惠比於君臣名分之際則大小不侔矣

# 齊人歸我濟西田

宣公於齊順其所欲既以女妻其臣又以兵會伐萊之舉又每歲往朝於齊廷雖諸侯事天子無是禮也故惠公悅其能順事已而以所取濟而田歸之也歸謹及闡直書曰歸此獨書我者乃相親愛惠遺之意深著齊人助成弑逆之罪也或謂濟西魯之本封故書我則誤矣以柔巽卑屈事人不以其道而得地與悅人之柔巽卑屈事已不以其道而歸其地皆人欲之私而非義矣

夏四月丙辰日有食之

己巳齊侯元卒音註

惠公卒子頃公立

齊崔氏出奔衛音註

崔氏謂齊大夫崔杼

按左氏崔杼有寵於惠公高國畏其逼也公卒而逐之奔衛書曰崔氏以族奔也許翰以謂崔杼出而能

反反而能弑者以其宗彊於此舉氏辨之早也其說得矣所謂譏世卿者非公羊本旨蓋門弟子因尹氏武氏稱世卿而附益之於此爾經有事同而詞異亦有事異而詞同一視之則泥而不通矣  
**音註**  
泥去聲

公如齊音註

魯朝於齊止此

五月公至自齊

文約而事詳者經也春如齊朝惠公夏如齊奔其喪若是雖不致可也而皆致者甚之也天王之喪不奔欲行郊禮而汲汲於奔齊惠公之喪天王之葬不會使微者往而公孫歸父會齊惠公之葬其不顧君臣上下尊卑之等所謂肆人欲滅天理而無忌憚者也詞繁而不殺聖人之情見矣

癸巳陳夏徵舒弑其君平國音註

靈公弑子成公午立

陳靈公之無道也而稱大夫之名氏以弑何也禍莫大於拒諫而殺直臣忠莫顯於身見殺而其言驗洩治所為不憚斧鉞盡言於其君者正謂靈公君臣通於夏徵舒之家恐其及禍不忍坐觀故昧死言之靈公不能納又從而殺之卒以見弑而亡其國此萬世之大戒也特書徵舒之名氏以見洩治忠言之驗靈公見弑之由使有國者必以遠色修身包容狂直開納諫諍為心也以為罪不及民故稱大夫以弑者非經意矣

六月宋師伐滕

前國滕稱人刺伐喪也此伐滕稱師譏用衆也宋大國爵上公霸主之餘業力非不足也今隣有弑逆不

能聲罪致討乃用大衆以伐所當矜恤之小邦且滕  
不事已無乃已德猶有所闕而滕何尤焉故特稱師  
以著其罪而汲汲於誅  
亂臣討賊子之意見矣

### 公孫歸父如齊葬齊惠公

歸父仲遂之子貴而有寵宣公深德齊侯之能定其  
位而又以濟西田歸之也故生則傾身以事之而不  
辭於屈辱沒則親往奔喪而使貴卿會其葬亦不  
顧天王之禮闕然莫之供也比事考詞義自見矣

### 晉人宋人衛人曹人伐鄭

按左氏鄭及楚平諸侯伐鄭取成而還其稱人貶也  
鄭居大國之間從於彊令豈其罪乎不能以德鎮撫  
而用力爭之是謂五十步笑百步庸  
何愈於楚自是責楚益輕罪在晉矣

秋天王使王季子來聘音註

王季子即劉康公周聘止此

公羊傳曰王季子者王之母弟也王有時聘以結諸侯之好禮也宣公享國至是十年不朝于周而比年朝齊不奔王喪而奔齊侯喪不遣責卿會匡王葬而使歸父會齊侯之葬縱未舉法勿聘焉猶可也而使王季子來王靈益不震矣自是王聘春秋亦不書矣

公孫歸父帥師伐邾取繹音註

繹邾邑○宣公而下征伐在大夫故自取繹凡

取皆不書其人自伐祀凡伐皆不書公

用貴卿為主將舉大眾出征伐不施於亂臣賊子奉天討罪而陵弱侵小近在邦域之中附庸之國是為盜也當此時陳有弑君之亂既未赴告藏在諸侯之策矣曾不是圖而有事於邾不亦慎乎故四國伐鄭

敗而稱人魯人伐邾  
特書取繹以罪之也  
音註將去聲  
眞音顛

大水

季孫行父如齊

冬公孫歸父如齊音註宣公聘齊止此

按左氏行父如齊初聘也歸父如齊邾故也齊侯嗣立宣公親往奔其父喪又使責卿會葬矣若待逾年然後修聘未晚也而季孫孟行歸父繼往則以宣公君臣不知為國以禮而謂妄說取人以免於討也歸父貪於取繹畏齊而往蓋理曲則氣必餒矣能無畏乎哉春秋備書而不削以著其罪為後世鑒也

齊侯使國佐來聘音註國佐即國武子○齊魯之交自此疎矣



莫之速也太不懷也又未逾年而以君命遣使聘於鄰國則哀戚之情忘矣孟子曰養生不足以當大事惟送死可以當大事滕文公五月居廬未有命戒及至葬顏色之戚哭泣之哀弔者大悅而有願為其氓者蓋禮義人心之所同然也齊頃公嗣位之初舉動如此喪師失地幾見執獲豈特婦人笑客之罪哉已失守身之本矣

饑

# 楚子伐鄭

經有詞同而意異者比事以觀斯得之矣九年楚子伐鄭稱爵者貶詞也若曰國君自將恃強壓弱憑陵中夏之稱也知然者以下書晉卻缺帥師救鄭則貶楚可知矣此年楚子伐鄭稱爵者直詞也若曰以實

屬詞書其重者而意不以楚為罪也知然者以傳書  
晉士會救鄭逐楚師於潁北而經削之則責晉可知  
矣此類兼以傳為案者也

癸定王十有一年

晉景二齊頃公無野元年衛穆二蔡  
文十四鄭襄七曹文二十陳成公午

元年杞桓三十九宋文  
十三秦桓七楚莊十六

春王正月

夏楚子陳侯鄭伯盟于辰陵音註

辰陵陳地○序楚子  
於陳侯鄭伯之上初

予楚莊  
以伯也

晉楚爭此二國為日久矣今陳鄭背晉從楚盟于辰  
陵而春秋書之無貶詞者豈與其下喬木入幽谷乎

中國不能令則吳楚進矣經之大法在誅亂臣討賊  
子有亂臣則無君有賊子則無父無父無君則以君  
父為弁髦以弑逆為常事雖得天下不能一朝居也  
今魯與齊方用兵伐莒晉與狄方會於欒函而不謀  
以西氏之逆也而楚人能謀之所謂禮失而求之野  
夷狄之有君不如諸夏之亡也辰陵之盟所以得書  
於經而詞無貶乎聖人討  
賊之意可謂深切著明矣  
音註  
背音  
珮

公孫歸父會齊人伐莒

秋晉侯會狄于欒函音註

○欒函狄地欒才端反函音咸  
楚方倡義于天下而晉收

狄于羣狄至往  
會焉晉卑甚矣

春秋正法不與夷狄會同分類也書會戎會狄會吳  
皆外詞也內中國故詳外夷狄故畧今中國有亂天

王不能討則方伯之責也又不能討則四隣諸侯宜有請矣而魯方會齊伐莒晉方求成于狄是失肩背而養其一指不能三年而總小功之察不亦慎乎凡此直書其事不待貶絕而義自見者也

冬十月楚人殺陳夏徵舒音註

不言楚子而稱人討賊之詞也以是為國人殺

之也

丁亥楚子入陳音註

楚人國書爵始此○先書殺後書入予楚以討賊之義也不以利陳

累莊

王也

稱人者眾詞也大惡人人之所同惡人人之所得討其稱楚人殺徵舒諸夏之罪自見矣按左氏傳楚子為夏氏亂故謂陳人無動將討于少西氏遂入陳殺徵舒輟諸栗門而經先書殺後書入者與楚子之能

討賊故先之也討其賊為義取其國為貪舜跖之相  
去遠矣其分乃在於善與利耳楚莊以義討賊勇於  
為善舜之徒也以貪取國急於為利跖之徒矣為善  
與惡特在一念須臾之間而書法如此故春秋傳心  
之要與不可以不察者也或曰聖人大改過楚雖縣  
陳能聽申叔時之說而復封陳可謂能改過矣猶書  
入陳以敗之何也曰楚莊意在滅陳雖復封之然鄉  
取一人焉以歸謂之夏州而又納其亂臣是制人之  
上下使不得其君臣之道也晉人以帶如鄭問駟乞  
之立故子產對曰若寡君之二三臣而晉大夫專制  
其位是晉之縣鄙也何國之為辭客幣而報其使晉  
人舍之他國非所當與也而必欲納其亂臣存亡興  
滅其若是乎仲尼重傷中國深美其有討賊之功  
故特從末減不稱取陳而書入雖曰與之可矣

音

註辭客幣而報其使晉人舍  
之事見左傳昭公十九年

納公孫寧儀行父子陳

此二臣者從君于昏宣淫於朝誅殺諫臣使其君見  
弑蓋致亂之臣也肆諸市朝與衆同棄然後快於人  
心今乃說詞奔楚託於討賊復讐以自脫其罪而楚  
莊不能察其反復又使陳人用之是猶人有飲毒而  
死者幸而復生又彊以毒飲之可乎故聖人外此二  
人於陳而特書曰納納者不受而彊納之者也為楚  
莊者宜奈何諸微舒之宮封洩冶之墓尸孔寧  
儀行父於朝謀於陳衆定其君而去其庶幾乎  
諸音

春秋傳卷十七

春秋傳卷十八

宋 胡安國 撰

宣公下

甲定王十有二年

晉景三齊頃二衛穆三蔡文十五鄭襄八曹文二十一陳成二杞桓四十

宋文十四秦桓八楚莊十七

春葬陳靈公

討賊者非臣子也何以書葬天下之惡一也本國臣子或不能討而上有天王下有方伯又其次有四隣有同盟有方域之諸侯有四夷之君長與凡民皆得而討之所以明大倫存天理也徵舒雖楚討之陳之



臣子亦可以釋怨矣  
故得書葬君子詞也

# 楚子圍鄭

按公羊傳例戰不言伐圍不言戰入不言圍滅不言  
入書其重者楚子縣陳蓋滅之矣而經止書入其於  
鄭也入自皇門至於達道蓋即其國都矣而經止書  
圍曷為悉從經典不著其憑陵諸夏之罪乎上無天  
王下無方伯天下諸侯有臣弑君子弑父諸夏不能  
討而夷狄能討之春秋取大節略小過雖如楚子憑  
陵上國近造王都之側猶從末減於以

音註  
傳作達

路公羊  
作路衛

夏六月乙卯晉荀林父帥師及楚子戰于邲晉師敗績

音註

邲鄭地也一音必又音弼

戰而言及主乎是戰者也按左氏晉師救鄭經既不  
以救鄭書矣又不言楚晉戰于邲而使晉主之何也  
陳人弑君晉不討賊而楚能討之楚人圍鄭亦既退  
師與鄭平矣而又與之戰則非觀釁之師也故釋楚  
不貶而使晉主之獨與常詞異乎按邲之役六卿並  
在大夫司馬皆具官不欲勦民者三帥也違命濟師  
者先穀也而獨罪林父何也尊無二上定于一也古  
者仗鉞臨戎專制閫外雖君令有所不受況其屬乎  
蔡書救鄭軍帥之欲戰者八人武子遂還衆不敢逼  
偏陽之舉勾偃二將皆請班師荀瑩令曰七日不克  
必爾乎取之遂下偏陽林父既知無及於鄭馬用之  
矣諸帥又皆信然其策先穀若獨以中軍佐濟者下  
令三軍無得妄動按軍法而行辟夫豈不可既不能  
令乃畏失屬亡師之罪而從韓獻子分惡之言知難

而冒進是棄晉師於誰責乎故後誅先穀  
音註樂書  
不去其官此稱敗績特以林父主之也

軍帥之欲戰者八人武子遂還衆不敢過事見左傳  
成公六年偏陽之舉勾偃二將皆請班師荀營令曰  
七日不克必爾乎取之遂下  
偏陽事見左傳襄公十年

秋七月

冬十有二月戊寅楚子滅蕭音註

蕭宋附庸國

假於討賊而滅陳春秋以討賊之義重也末滅而書  
入惡其貳已而入鄭春秋以退師之情恕也末滅而  
書國與人為善之德宏矣至是肆其強暴滅無罪之  
國其志已盈雖欲赦之不得也故傳稱蕭潰經以滅  
書斷其罪也孟子曰以力假仁者伯伯必有大國楚  
莊蓋以力假仁不能久假而遽歸者也連萬國親諸

侯者先王之政興滅國繼絕世者仲尼之法今乃滅  
人社稷而絕其祀亦不仁甚矣蕭既滅亡必無赴者  
何以得書於魯史楚蒧縣陳入鄭大敗晉師於郟莫  
與校者不知以禮制心至於勝溢克伐怨欲皆得行  
焉遂以滅蕭告赴諸侯於其威力以恐中國耳孟子  
定其功罪以五伯為三王之罪人春秋史外傳心之  
要典推此類  
求之斯得矣

晉人宋人衛人曹人同盟于清丘音註

清丘衛地○書人同盟猶曰人

自為盟也書法如惡曹  
鹿上中國又無伯也

書同盟志同欲也或以惡其反覆而書同盟非也春  
秋不貴盟誓自隱公始年書儀父盟蔑宋人盟宿已  
不實言矣奚待清邱然後惡其反覆乎清邱載書血  
病討貳口血未乾敗其盟好所謂不待貶而惡見者

也又矣必人諸國之卿然後知反覆之可罪乎楚既入陳圍鄭大敗晉師伐蕭滅之憑陵中國甚矣為諸侯計者宜信任仁賢脩明政事自強於為善則可以保其國耳曾不是國而刑牲歃血要質鬼神斷以禦楚謀之不臧孰大於是故國卿敗而稱人讓失職也原穀違命喪師乃晉國罪人而主茲盟約所信任者皆可  
知矣  
音註  
斬音

# 宋師伐陳衛人救陳

陳有弑君之亂宋不能討而楚能討之雖曰縣陳尋復封之其德於楚而不貳未足責也宋人不能內自省德適以大衆伐之非義舉矣衛人救陳背盟失信而以救書者見宋師非義陳未有罪而受兵為可恤也且謀國失圖安與師旅無休息之期則亂益滋矣其以救書意在責宋也若衛叛盟則不待貶絕而惡

自見  
矣

乙定王十  
丑一年

十有三年

晉景四齊頃三衛穆四蔡文十  
鄭襄九曹文二十二陳成三杞桓

四十一宋文十五  
秦桓九楚莊十八

春齊師伐莒

夏楚子伐宋

楚人滅蕭將以脅宋諸侯懼而同盟為宋人計者恤  
民固本輕徭薄賦使民效死親其上則可以待敵矣  
計不出此而急於伐陳攻楚與國非  
策也故楚人有詞於伐而得書爵

秋螽

冬晉殺其大夫先穀音註

書名以罪討

先穀違命大敗晉師元帥不能用鉞已失刑矣今又重有罪焉晉人治其罪而戮之義也何為稱國以殺而不去其官夫兵者安危所繫有國之大事也將非其人則敗雖得其人使親信問之則敗以剛愎不仁者參焉而莫肯用命則敗凡此三敗君之過也河曲之戰趙穿獨出而史駢之謀不用濟涇而次櫟廩欲東而荀偃之令不行今林父初將中軍乃以先穀佐之使敵國謀臣知其從政者新未能行令誰之過歟故稱國以殺不去音註河曲之戰趙穿獨出而史駢其官罪累上也音註之謀不用事見左傳文公十二年濟涇而次櫟廩欲東而荀偃之令不行事見左傳襄公十四年廩於斬反

丙寅定王十有四年

晉景五齊頃四衛穆五蔡文十七鄭襄十曹文二十三卒陳成四杞

桓四十二宋文十六  
秦桓十楚莊十九

# 春衛殺其大夫孔達

殺大夫而書名氏義不繫於專殺也孔達棄信以危社稷衛人按其罪而誅之可也何以稱國而不去其官用人謀國干犯盟主至於見討誰之過歟稱國以殺不去其官罪累上也春秋端本清源故書法如此

夏五月壬申曹伯壽卒

音註  
文公卒子宣公廬立

# 晉侯伐鄭

按左氏傳為卻故也比事以觀知其為報怨復讎之兵詞無所貶者直書其事而義自見矣

音註

見現音



# 秋九月楚子圍宋

宋人要結盟誓欲以禦楚已非持國之道輕舉大衆  
勸民妄動又非恤患之兵特書救陳以著其罪明見  
伐之由也國必自伐然後人伐之凡事其作始也簡  
其將畢也必巨易於訟卦曰君子以作事謀始始而  
不謀必至於訟訟而不竟必至於師若宋是矣始謀  
不臧至於見伐見圍幾亡其國則自取之也春秋端  
本故責宋為深若蠻夷圍中國則亦明矣

## 葬曹文公

## 冬公孫歸父會齊侯于穀

夫禮別嫌明微致治于未亂自天子出者也列國之  
君非王事而自相會聚是禮自諸侯出矣以國君而

降班失列下與外臣會以外臣而抗尊出位上與諸  
侯會是禮自大夫出矣君若贅旒陪臣執命豈一朝  
一夕之故其所由來漸矣故易於坤之初六曰馴致  
其道至堅冰也易言其理春秋見諸行事若合符節  
可謂深切  
著明矣

丁定王十  
卯三年

十有五年

晉景六齊頃五衛穆六蔡文十八  
鄭襄十一曹宣公廬元年陳成五

杞桓四十三宋文十七  
秦桓十一楚莊二十

春公孫歸父會楚子於宋音註

魯大夫始  
特會楚

楚子不假道於宋以啟釁端而圍之陵蔑中華甚矣  
諸侯縱不能畏簡書攘夷狄存先代之後嚴兵固圉  
以為聲援猶之可也乃以周公之裔千乘之國謀其  
不免至於薦賄不亦鄙乎若此類聖人不徒筆之於

經也比事以觀則知中國夷狄  
音註比去聲  
威衰之由春秋經世之畧矣

# 夏五月宋人及楚人平音註

凡平不書必闕天下之故而後書文九年陳平不書

宣十年鄭平不書僖二十四年宋嘗及楚平矣  
不書必莊王得宋天下將有南北之勢始書之

此華元子反二國之卿其稱人何貶也春秋賤欺詐  
惡侵伐二卿不愛其情釋怨解紛使宋無亡國之憂  
楚無滅國之罪功亦大矣宜在野復何以貶也善則  
稱君過則稱己則民作忠今二卿自以情實私相告  
語取必於上以成平國之功而其君不預知焉非人  
臣之義也世衰道微暴行交作君有聽於臣父有聽  
於子夫有聽於婦中國有聽於夷狄仲尼所為懼春  
秋所以作也故平以解紛雖其所欲而平者在下則  
大倫紊矣聖人明其道不計其功故褒貶如此然則  
臣而有安國家利社稷者專之不可乎曰專之而可

者謂境外也子反在君之側無奏報之難幾會之失  
奚急於平而專之若是哉或曰子反攘善則知其罪  
矣華元救國急難而紆其情實何尤焉夫宋先代之  
後武王所封以備三恪橫見侵侮非有可滅之罪也  
若以大義責之曰子為上卿不能恤小助桀為虐陵  
我郊保圍我城郭欲滅我社稷縱子得之何面目見  
中華之士乎使子反果忠莊王果賢必為義動退師  
止衆結盟而反矣何必輕見情實蹈不測之險乎後  
世羊陸放其所為交歡邊境而議者以為非純臣也知春秋之法矣

六月癸卯晉師滅赤狄潞氏以潞子嬰兒歸音註

潞赤狄之

別號潞氏國故稱氏子爵也

其稱曰謹之也上卿為主將畧而稱師者著其暴也  
滅而舉號及氏者滅見滅之罪著滅者之甚不仁也

潞嬰兒不死社稷比於中國而書爵者免嬰兒之責  
詞也然則攘夷狄安諸夏非耶徐夷並興東郊不開  
伯禽征之獫狁孔熾侵鎬及方宣王伐之楚人侵鄭  
近在王畿齊侯攘之皆門庭之寇不可縱而莫禦者  
也雖禦之亦不極其兵力殄滅之無遺育也今赤狄  
未嘗侵掠晉境非門庭之寇而恃強暴以滅之其不  
仁甚矣春秋所以責晉而畧狄也又有異焉者夫伐  
國之要討其罪人斯止矣按左氏潞子夫人晉景公  
之姊也鄆舒為政而殺之又傷潞子之目則鄆舒者  
罪之在也為晉計者執鄆舒輟諸市立黎侯安定潞  
子改紀其政而返則諸狄服疆域安矣今乃利狄之  
土滅潞氏以其君歸何義乎春秋所以責晉而畧狄  
也

**音註**

徐夷並興東郊不開伯禽征之見書費誓獫狁孔熾侵鎬及方宣王伐之見詩小雅六月

鎬合老反  
輟音患

# 秦人伐晉

王札子殺召伯毛伯音註

召音邵

王臣有書字而言子者王季子是也有書子而繫名者王季虎是也此稱王札子者穀梁以為當上之詞也其為當上之詞者矯王命以殺之也為天下主者天也繼天者君也君之所司者命也為人臣而侵其君之命則不臣為人君而假其臣以命則不君君不君臣不臣天下所以傾也邢侯專殺雍子於朝叔向以殺人不忌為賊請施邢侯君子以為義王札子之罪當服此刑而天王不能施之無政刑矣何以保其國而不替乎

音註

邢侯專殺雍子於朝叔向以為義王札子之罪當服此刑而天王不能施之無政刑矣何以保其國而不替乎

昭公十四

年朝音潮

# 秋螽

人事感於此則物變應於彼宣公為國虛內以事外  
去實而務華煩於朝會聘問路遺之末而不知務其  
本者也故戾氣應之六年螽七年旱十年大水十有  
三年又螽十有五年復螽府庫置倉廩竭調度不給  
而言利剋民之事起矣

仲孫蔑會齊高固于無婁音註

無婁杞邑

禮之始失也諸侯非王事而自相會也無以正之不  
自天子出矣然後諸侯與大夫會又無以正之然後  
大夫與大夫會禮亦不自諸侯出矣田氏篡齊六卿  
分晉三家專魯理固然也不能辨於早雖欲正之其  
將能乎

音註

諸侯與大夫會詳見文公元年會戚註大  
夫與大夫會詳見文公八年盟衡雍註

# 初稅畝

孟子曰耕者助而不稅則天下之農皆悅而願耕於其野矣書初稅畝者譏宣公廢助法而用稅也殷制公田為助助者藉也周因其法為徹徹者通也其實皆什一也古者上下相親上之於下則曰駿發爾私終三十里惟恐民食之不給也下之於上則曰雨我公田遂及我私惟恐公田之不善也故助法行而頌聲作矣世衰道微上下交惡民惟私家之利而不竭力以奉公上惟邦賦之入而不惻怛以利下水旱凶災相繼而起公田之入薄矣所以廢助法而稅畝乎初者志變法之始也其後作邱甲用田賦至於二猶不足則皆宣公啟之也故曰作法於涼其弊猶貪作法於貪弊將若何有國家者必欲克守成法而不變其必先務本乎



冬蟻生音註

蟻音緣  
又音院

始生曰蟻既大曰螽秋螽未息冬又生子災重及民也而詳志之如此者急民事謹天災仁人之心王者之務也遇天災而不懼忽民事而不修而又為繁政重賦以威之國之危無日矣

饑

春秋饑歲多矣書于經者三而宣公獨有其二何也古者三年耕餘一年之畜九年耕餘三年之食雖有凶旱民無菜色是歲雖螽而遽至于饑者宣公為國務華去實虛內事外繁于朝會聘問賂遺之末而不敦其本府庫竭矣倉廩匱矣水旱螽蟻天降饑饉亦無以賑業貧乏矣經所以獨而書饑以示後世為國之不可不敦本也

戊定王十  
辰四年

十有六年

晉景七齊頃六衛穆七蔡文十九  
鄭襄十二曹宣二陳成六杞桓四

十四宋文十八秦桓  
十二楚莊二十一

春王正月晉人滅赤狄甲氏及留吁

按左氏董是役者士會也上將主兵其稱人貶詞也  
甲氏潞之遺種留吁其殘邑也春秋於夷狄攘斥之  
不使亂中夏則止矣伯禽征徐夷東郊既闢而止宣  
王伐獫狁至於太原而止武侯征戎瀘服其渠帥而  
止必欲盡殄滅之無遺種豈仁人之心  
王者之事乎士會所以貶而稱人也  
音註 甲氏雷  
之別 種

夏成周宣榭火

成周天子之東都宣榭宣王之廟也按呂大臨考古圖有邠敦者稱王格於宣榭呼內史策命邠是知宣榭者宣王之廟也古者爵有德祿有功必於太廟示不敢專也榭者射堂之制其堂無室以便射事故凡無室者皆謂之榭宣王之廟謂之榭者其廟制如榭也宣廟火何以書以宗廟之重書之也貴戚擅殺大臣而天子不討王室不復能中興矣人火之天所以見戒乎

音註

呂大臨藍田人字與叔程門高

弟邠皮應反敦音對

# 秋邠伯姬來歸

按左氏邠伯姬來歸出也內女出書之策者男女居室人之大倫也婚姻之禮廢則夫婦之道苦淫辟之罪多矣復相棄背喪其配耦氓之詩所以刺衛日以衰薄室家相棄中谷有推所以閔周易叙咸恒為下

經首春秋內女出夫人歸凡男女之際詳書于策所以正人倫之本也其旨微矣

冬大有年音註

大有年謂五穀大熟也

程氏曰大有年記異也旱乾水溢饑饉荐臻者災也山崩地震彗孛飛流者異也景星甘露醴泉芝草百穀順成者祥也大有年上瑞矣何以為記異乎凡災異慶祥皆人為所感而天以其類應之者也人事順於下則天氣和於上宣公弑立逆理亂倫水旱螽蟥饑饉之變相繼而作史不絕書宜也獨於是冬乃大有年所以為異乎夫有年大有年一耳古史書之則為祥仲尼筆之則為異此言外微旨非聖人莫能修之者也

已定王十有七年

晉景八齊頃七衛穆八蔡文二十卒鄭襄十三曹宣三陳成七杞桓

四十五宋文十九秦  
桓十三楚莊二十二

春王正月庚子許男錫我卒音註

昭公卒子  
靈公立

丁未蔡侯申卒音註

文公卒子  
景公國立

夏葬許昭公葬蔡文公

日卒書名赴而得禮記之詳也葬而不月其畧在內  
宣公為國務華而無忠信誠懇之心計利而不知禮  
義邦交之實哀死送終獨厚於齊而利害不切其身  
者皆闕如也大則薄其君親次則忽於盟主又其次  
若秦若衛若滕雖來告訃怠於禮  
而不會也比事以觀義自見矣

六月癸卯日有食之

己未公會晉侯衛侯曹伯邾子同盟于斷道音註

斷地

斷音短同盟至新城而再見斷道之後不曰同盟者寡矣

書同盟者志同欲也大國率之小國畏威而從命非同欲也小國訴之大國勉強而應焉非同欲也若斷道之盟諸侯同心謀欲伐齊釋其忿怒非有不得已而要之者也或以為會同天子之事築宮為壇設方明如方嶽之盟故書同疑其說之誤矣

秋公至自會

冬十有一月壬午公弟叔肸卒音註

肸許乙反

稱弟得弟道也稱字賢也何賢乎叔肸宣執而非之也非之則胡為不去也兄弟無絕道故雖非之而不

去也與之財則曰我足矣終身不食宣公之祿君子  
以是為通恩也論情可以明親親言義可以厲不軌  
所以取貴乎春秋書曰公弟而稱字以表之也公子  
為正大夫而書卒貴也不為大夫而特書卒賢也或  
以為叔肸寵弟在宣公有私親之愛故生而賜氏俾  
世其卿與季友仲遂比則其說誤矣誠使叔肸有寵  
生而賜氏則是貴戚用事之卿豈有不見於經者齊  
年鄭語在外之見於經者季友仲遂在內之見於經  
者勢必與聞政事執國命矣况宣公之時煩於聘問  
會朝之禮遂蔑季孫歸父交於隣國眾矣而獨叔肸  
不與焉其非生而賜  
氏俾世其卿亦明矣

庚定王十  
年六年十有八年

晉景九齊頃八衛穆九蔡景公固  
元年鄭襄十四曹宣四陳成八杞

桓四十六宋文二十秦  
桓十四楚莊二十三卒

# 春晉侯衛世子臧伐齊

保國以禮為本者也齊頃公不謹於禮自己致寇所謂國必自伐而後人伐之矣諸侯上卿皆執國命取必於其君以行其克伐怨欲之私故盟于斷道師於陽穀大戰於鞏逞其志而後止春秋詳書於策見伐與伐者之罪皆可以為鑒矣

音註

鞏音安

公伐杞音註

自是不書君將征伐在大夫也○宣公而下征伐在大夫是故自伐邾取繹凡取皆

不書其人自伐杞凡伐皆不書公

## 夏四月

## 秋七月邾人戕鄆子于鄆音註

戕音牆



哉者殘賊而殺之也于鄢者刺臣子不能救君難也夷貉無城郭宮室百官有司單車使者直造其廬帳虜其酋長者則有之矣中國則重門擊柝廉陛等威侍衛守禦之嚴奚至於坐使其君為邦人殘賊殺之而莫禦乎邦人蓋嘗執鄢子用之則不共戴天之世雖也既不能復又使邦人得造其國都而戕殺其君曰于鄢者所以深責鄢之臣子至此極也

音註

貉音麥

甲戌楚子旅卒音註

莊王卒子共王立楚始書卒

楚僭稱王降而稱子者是仲尼筆之也其不書葬者恐民之惑而避其號是仲尼削之也若楚若吳若徐皆自王降而稱子若滕自侯降而稱子若杞自伯降而稱子四夷雖大皆曰子其降而稱子者狄之也或謂春秋不擅進退諸侯亂名實則非矣述天理正人倫此名實所由定也奚名為亂哉

# 公孫歸父如晉

宣公因齊得國故意事之雖易世猶未怠也及頃公不能謹禮怒晉魯上卿而卻克當國決策討之晉方強盛齊少懦矣於是背齊而事晉其於邦交以利為向背無忠信誠慤之心者也按左氏歸父欲去三桓以張公室與公謀而聘於晉欲以晉人去之夫輕於背與國易於謀大家而不知其本未有能成而無悔也然則公室不可張乎裕引其君當道正心以正朝廷禮樂刑政自己出也其庶幾乎必欲倚外援以去之是去疥瘍而得腹心之疾也庸愈哉

## 冬十月壬戌公薨于路寢

歸父還自晉至笙遂奔齊音註

笙魯境也

仲尼稱孟莊子之孝其不改父之臣與父之政是難能也又曰三年無改於父之道可謂孝矣夫仁人孝子於其父之臣非有大不可如晉悼公於夷羊五之屬必存始終進退之禮而不遽也歸父以君命出使未反而君薨在聘禮有執主復命於殯之文升自西階子臣皆哭情亦戚矣今宣公猶未殯而東門氏逐忍乎哉書曰歸父還自晉者已畢事之詞也至笙遂奔齊者罪成公君臣死君而忘父逐之亟也穀梁子曰捐殯而奔其父之使者是亦奔父也得經意矣君薨家遺方寸宜亦亂而造次顛沛不失禮焉非志於仁者弗能也詞繁而不殺歸父之善自著矣比事以觀則見當國者有無君之心此春秋所以作不可不察也

春秋傳卷十八